



23598

hist. b. 1 p. 638

324989
#1

Succhetim

(Jean Sarrment)


COMPENDIUM
 Admirabilis Vitæ
 S. ROSÆ
 DE S. MARIA

E Tertio S. Dominici Ordine.

AUTHORE

JOANNE LAURENTIO
 LUCCHESINIO LUCENSI
 è Societ. Jesu.

NONA EDITIO.



ROMÆ. MDCXCVI.
 Sumptibus Nicolai Angeli Tinassii
 Impressoris Cameralis, & Vatic.

Superiorum permissu.


Reimprimatur

Si videbitur Reuerendiss. P. Mag.
Sac. Pal. Apost.

Sperellus Episc. Interamnen. Vicesg.

Reimprimatur

Fr. Paulinus Bernardinius Ord. Præ-
dic. Sac. Apost. Pal. Mag.



EMIN.^{MO} ET REV.^{MO}

P R I N C I P I

JOANNI FRANCISCO

CARDINALI ALBANO.

Jo: LAURENTIUS LUCCHESINIUS
Fælicitatem.



*Via difficillima lege
adjecta, ne Tuas vi-
delicet in laudes ef-
fundar, meam hujus-
ce Consecrationis au-*

*daciam, Princeps Eminentissime,
coercuisti, novum excogito nuncu-
patoriæ morem Epistolæ, nihil
aliud serid præstare adortus, nisi
ut à me tria illa, ob quæ culpari
possem, amoliar. Hoc, inquam,
unum serid conficiam; nam si quid-*

*piam ex innumeris Tuis Dotibus ,
in quibus alioquin exultans æstua-
ret oratio , delibare obiter coget
necessaria meæ causæ defensio , mihi
verti crimini nequaquam poterit
absque insigni rigore , à quo lon-
gissimè abest Clementia Tua . Per-
stringi primò possum eò quòd
meum huic Opusculo nomen præfi-
gam , quod toties in theatrum non
prænotato Scriptore prodivit :
perinde ac si è sipario tandem ali-
quando profiliam , paucas ut pa-
gellas eximio quædam Heroi conse-
crare . Alterum , in me à plurimis
improbandum , est , quod omnigenâ
Sapientiâ ornatissimo Ecclesiæ Se-
natori Historicam solūmodo unius
Narrationem Vitæ seligam dedi-
candam . Tertium , quod ipsius
quoque Narrationis tenue tantum ,
minimumque Compendium Magno
Principi exhibeam . Sed cum ite-
rum hæc Epitome Typis nunc subii-
cia-*

ciatur, quia nulla eius *Exempla*,
jamdiu à multis quaesita, supere-
rant, integrum amplius mihi non
est delitescere post editam rursus
Anno 1676. à Nathanaele Sotuel-
lo *Scriptorum nostri Ordinis Bi-*
bliothecam, in qua *Compendium*
hoc cum cæteris à me scriptis eò us-
que *Libris* recenseri voluit celeberrimus
Theologus Martinus de Es-
parza, quo urgente illud ex publi-
cis *Actis*, quæ *Processus* dicunt,
in lucem eduxeram, cum agebatur
de *Beata Appellatione Rosæ* verè
Admirabili tribuenda. Quemad-
modum verò etiam post illam inter
Sanctas relatum excusum prælo
deinde sæpius fuit nunquam appo-
sito *Auctoris* nomine, licet non
defuerit *Nuncupator*: ita perpe-
tuò latuissim, nisi aliena me in sce-
nam humanitas rapuisset. Cum igitur
nunc primum post vulgatum
Indicem illum hæc publici *Juris*

*Vita iterum fiat, Præsidium eidem
à me , ac Decus quærendum fuit .
Hoc autem à Te , Princeps Eminentissime , flagitare ausus , alterum diluo , cujus gratiâ fortasse traducar . Siccine , inquit aliqui , Sapientissimo Principi , in quo Doctrinarum omnium concentus omnes admiratione suspendit : qui Græcæ , Latinae , nostræque Linguae facundiâ elegantissimâ Trismegistus : qui Philosophiæ , Theologiæ , tum quæ Naturam Divinam contemplatur , tum quæ pugnat in hostes Fidei , Cæsareique , ac Pontificii Juris fontes exhausit omnes : Historica interim solummodo unius inscribitur Vitæ Narratio ? Ita planè , cum aliquod certè Vectigal solvendum illi sit , cui me , ac Sanguine , vel Religiosâ Familiâ conjunctos mihi innumeris esse nominibus devinctissimos noverunt , quotquot me degere non ignorant*

rant inter mortales: & ab aliis altioris argumenti, quæ affecta mihi sunt, dicandis Voluminibus, procul me idem submoveat Ingenij fascibus, adcoque ingens occurrat, ut laceffere verear eorundem consecratione Judicium præstantissimi Ingenij, licet mira humanitate præditum meas erga Literarias nugas fuerim semper expertus; plurimum enim interest, ut Senior inquit Plinius, sortiatur aliquis Judicem, an eligat. Libenter iisdem, quibus ille Profanum Titum, Sacrum alloquor verbis, priscum beneficentissima propensione animi antegressum, & in quo sunt verius, quàm in veteri Tita, omnium amorem allicientes Generis humani Deliciæ. Quavis cum reformidem offerre si quid ex aliarum disciplinarum foetura natum apud me sit, hac quoque Opella non nisi religiosè, Princeps Eminentissime,

adiris, qui penè Puer miro candore à Te Latii Linguâ donatos Græcos Patres Typorum beneficio eruditorum oculis subjecisti: ut de cætera Oratoria Tua, & olim Poetica, Latina, Græcaque Elegantia, deque, in Regia dictis Academia, Regali profectò Verborum, Sententiarumq; splendore cõtextis Etruscis Dissertationibus, deque Pontificiis Constitutionibus, ac Literis uberrimâ lectissimorum Divinis ex Oraculis florum copiâ fulgentibus, conticescam. Sed cum aliquid (ut in hoc hæream) omnino Tibi dicandum sit, ad hoc eligendum qualecumq; Compendium plures me Causæ impulerunt, quas innuens refellam id, quod tertium in me torqueri posse comperio. Ut cumq; tenuissimam hanc esse Scriptionem ultro profitear, Regium tamen illa, eundemque Cælestem exhibet Florem multiplici Tibi.

no-

nomine respondentem : sicut enim
in hartis Rosa , ita Ipse in animis
regnas , & perinde ac Rosa specie
pulcherrima exhilarat , odore sua-
vissimo reficit , adeoq; munifica est ,
ut quatuor supra triginta Histori-
cus Naturæ morbos recenscat , qui-
bus medelam affert : ita blando ful-
gure risus temperas oris majesta-
tem , latèq; diffuso Virtutum odo-
re omnium animos rapis , & bene-
ficentissima Indole adeo Clientibus
metum expungis , ut qualibuscum-
que tabescentia infortunij pecto-
ra Te mirabilem quotidie suæ sa-
lutis Æsculapium requirant , &
experiantur . Verùm multò magis
à Cælesti hac nostra , quàm ab
Hortensi Rosa Tuæ pinguntur Do-
tes , quemadmodum enim in illa
prodigiosa quædam enituit Virtu-
tum omnium complexio : ita præ-
cellens quoddam laudum omnium
fœdus in Te suspicimus , cui uni-

versa Superi Dona contulerunt ,
nobilissimi Generis Claritatem ,
perpetuam à primis annis. Vite In-
nocentiam (quam simul cum senili
etiamtum Prudentia , incompara-
biliq; Ingenio in Gregoriano Athe-
næo licuit mihi præ cæteris admi-
rari , haud dubiè , ac frequentissi-
mè ominato ad hoc Te fastigium
evolvendum) semperque adultam
Religionem , Consilii vim incredi-
bilem , eamque vastæ Capacitatem
Mentis , quæ , instar Cælestium
Orbium , continuo curarum motu
faustitatem mortalibus elaboran-
te refici videatur . Ad Rosam , uti
recentem Cælestis Viridarij Flo-
rem , & summa , quas à Divino
exorat Sponso , Gratiarum uberta-
te vernantem omnes anhelant . Ne-
que verò Te nunc solummodo am-
biunt omnes , sed etiam cum Cau-
sas in primo ad Sacram Rempu-
blicam accessu referebas , certabant

uni-

*universi Tuo suas ore proferri : ad
Te omnes Disceptatorem , ad Te
Arbitrum unanimes confluebant ,
licet inter se aliqui dissidentes ;
certissimi enim perpetuò fuerunt ,
ac porro sunt omnes de sublimi Tua
Integritate , Sapientia , ingenuoq;
Candore . Unum solummodo est ,
in quo Te ab similem Rosæ cupia-
mus omnes , ne videlicet Te quoque
(sicut illam suæ semper spinæ sau-
ciabant) absq; ulla remissione ani-
mi semper vulnerent pro Republi-
cæ sollicitudines , quas ut identidem
relaxes , obsequentissimè flagita-
mus , ac , nisi Tibi , eidem parcas
Publicæ rei , cui nimium necesse est
Te diutissimè Ecclesiæ Divinæ fæ-
licitatì excubare . Inque hoc Voto,
Excusatione absoluta, conquiescat
Epistola , Tecum eloquuta de iis ,
quorum Prolusione ad Lectores
fuiſſet meæ causæ consulendum , ut
pateat , ad quantam me fiduciam*

*erigat Eminentissimus Princeps,
cui nullum addidit Regalis Pur-
pura supercilium. Hoc autem cum
Tibi ne in ipsis quidem Literis ut-
lum sit, veluti Sapientissimis esse
nequaquam solet, spondeo nunc
obsequentissimas alias (retexo enim
id, quod huc usque ratiocinando
confeci) humanissimo Mecænati
meo nuncupationes: perinde ac au-
sus fui alia Volumina Summis
Mortalium consecrare: utque hanc
interim arrham Tuo, idest semper
sereno, Vultu digneris excipere
oratum Te etiam atq; etiam velim.*

AUTHOR LECTORI



Ggressus compendio
includere admirabi-
lem Vitam Sanctissi-
mæ Virginis Rosæ à
Sancta Maria è Sacris
à me Actis erutum,
& ab eius præterea

tot Authoribus eleganter descri-
ptam, elaboratum è pretiosissimo la-
pide simulacrum, & ad unguem
Rosæ moribus respondens, ita deco-
re omni, & nativa pulchritudine
spoliavi, ut scribendum in illius basi
propemodum sit, quod Æliano teste
prisci solebant Pictores: Hæc statua
Rosam refert. Auro Peruvix suæ,
immo & siderum auro centum exa-
rata volumina vix cælestes Rosæ
mores complecti pro dignitate pos-
sent. Quid ergo verborum angustijs
includam monumenta Rosæ, quæ
satius esset fusioribus voluminibus
posteritati commendare? Consulen-
dum tamen est curis mortalium,
quorum plerique innumeris impli-
cantur; & breves, ideoque velocio-
res

res alicui Operi sunt aptandę, quod
ultra fines Herculeos ad fines usque,
deficientis naturę ab argumenti di-
gnitate proferetur. Sua igitur hanc
Epitomen brevitati Lectori commen-
dat: Commendant prodigiosę, quas
commemorat, Rosę virtutes, eo no-
mine gratiores, quod inter barbaras,
spinas adultę: quemadmodum ocu-
los, & manum legentis alliciunt pro-
gnati in scopulis flores, invidia natu-
rę frustra repugnantis obstetricante,
toto elemento lactati, & recreati fu-
riis Borę ferocientis. Si peregrinę
merces, invisę belluę, nec assuetę
meriti Europę Cælum aves omnium
studia rapiunt virtute magnetica: si
visus olim Romę Phoenix præstolan-
tia reditum æterni alitis Quiritum lu-
mina Cælo affixit, quàm blando co-
gnoscenti studio sapientum corda,
pertentabit peregrinus hic flos, quo
in uno tantus inferitur Cælo thesau-
rus, ut immensam jacturam com-
penset ob innumeros spinarum fascēs
ex illis quondam Inferorum colonijs
in tartara devolutos: & qui omnium
primus ex recentis incolis Mundi
pro-

provocavit summos honores? Quæ
demum cunque, dum Indica sit, vir-
tus curam Lectoris exacuit? Quid
summa? Quid inaudita prorsus, &
huic solùm Sponsæ concessa munera
Divinitatis? Nisi unam fortè Senen-
sem Catharinam excipias, quam adeo
Rosa moribus suis expressit, ut si
fuissent in Indijs Pythagoræ affectæ,
jurassent, ad animanda iterum Rosæ
membra venisse reducem Cathari-
nam. Hoc denique Italos ad legen-
dum ultro compellit, quibus ad ex-
teræ gratiam novitatis accedit in Ro-
sa domesticæ quodammodo virtutis
amor ob Catharinæ consortium.

Lectori Typographus.



*Aucis ego quoque prae-
bor, candide Lector. Li-
cet, quem iterum excudi-
mus, aureus hic libellus
nomen prae se Compendij
ferat, nihil tamen in illo
desideratur, quod sit in magnis Volumini-
bus idem argumentum amplexis. Non modò
gesta sed dicta recenset propemodum omnia.
Sanctiss. Virginis Rosae; adeo ipsius Author
Semper ad eventum festinat, & in medias res,
Non secus ac notas, Auditorem rapit:
Quam laudem Venusinus. Lyristes tribuit
Smyrnaeo, Mantuano potius Homero tri-
buendam. Ceterum Quarta quidem hac est
Romana hujus Opusculi Editio, sed Nona,
si praeterea enumerentur illae, quibus alibi
in Italia, Germania, & Polonia lucem
rursus aspexit: ut interim praeterrittan-
tur plurimae, quibus impressum est Gallicè,
Hispanicè, Polonicè, & Indicè; omnes
enim fermè linguae sui juris illud efficere
voluerunt. Meis autem tantummodo typis
sex mille Latina ejus exempla prodierunt:
cumque in praesentia nulla apud Biblio-
polas prostant venalia, exprimendum ite-
rum formis fuit, ut plurimorum votis fieret
satis. Vale & conatibus nostris fave.*



CAPUT PRIMUM.

*Rosa Natales, Indoles, Educatio,
votumque Virginitatis.*



ROSA à S. Maria,
Flos delibatus terra-
rum Orbis nuper in-
venti, Patriam ha-
buit Limam Regiam
Peruviae Urbem: Pa-

rentes Gasparem de Floribus, Ma-
riam ab Oliva, stirpe, non item opi-
bus nobiles. Illam mater anno Vir-
ginei partus 1586. die Aprilis vige-
sima enixa est fœlicissimo partu,
solita cæteroqui in aliorum puer-
perijs mirè torqueri: & prodivit in-
fans secundis pelliculis involuta,
veluti nascuntur Rosæ. Isabellæ
nomen inditum illi fuit ab avia
materna Isabella de Herrera. Sed
cum à matre, aliisque visa fuerit
repanda rosa insidere vultum tri-

me-



mestris parvulæ in cunis quiescentis, hoc aliud nomen à prodigio traxit : & Beatissima Virgo mystica Rosa jussit illam annis adultam à S. Maria cognominari ; adeoque prima forsan hæc fuit , quæ non solum divinitus nomen , ut alij , sed & cognomen acceperit . Eadem infanti Rosæ , quæ D. Catharinæ Senensi , indoles quieta, suavis, lepida : nunquam stridulis vagitibus turbavit ædes , ploravit nunquam , nisi cum semel in alienam domum illata ejulatu poposcit maternas latebras iam tum sibi gratissimas . Prodigiosum specimen heroicæ tolerantiae trimula exhibuit ; namque dextero pollice ab arca , dum properè clauditur , fortè correpto dolorem egregiè dissimulavit , & manum abscondit matri eò properanti . Hilaris deinde sensit acribus remediis totum ferè unguem absumi , & residuum lenta , ac violent-

lenta forcipe radicitus avelli : attonto ad hæc Ioanne Perez Chirurgo , qui tantillam Virginem gemere , aut expallescere nunquam vidit tempore acerbissimæ curationis . Et præcisa novaculâ vitiata , pars auris , & caput , ob adhibitam improspere ab imperita matre noxiam medelam , bullis turgidum , ac fossulis profundè ulceratum , à quadrimula Rosa gemitum nullum , aut molestiæ notam expressit ; cum tamen acerrimus dolor totum corpusculum identidem improvisa agitatione concuteret , & solidam noctem sub efferi cruciatus ardore voraci transegisset . Duos supra quadraginta dies , ut novam cutem induceret Chirurgus Virginem lancinavit : ac deinde sexenni ex intima nare phascolum tertio tractu demum exemit , obdurante in his tormentis Rosâ mirâ constantiâ . Hæc rudimenta spinarum

rum nostrum florem excoluere , ut gratissimum Sponso in ipsa infantia odorem exhiberet suavissimæ charitatis . Fortè puer virgunculæ frater inter ludendum luto illius comam imbuerat , quod cum Rosæ , non contemptum , at fordes averfatæ , accidisset ingratum : Scito , inquit frater concionatoris in morem , cultos puellarum cincinnos infernos rudentes esse , quibus illaqueantur incautæ animæ , ut in æterna supplicia detrahantur. Hæc verba Rosæ animum altius penetrarunt , & ad altissimam Dei notitiam vastissimæ illius menti aditum aperuerunt . Pulchritudine virtutis mirificè capta statim est . Statim exarsit in illa mira sitis orandi , adeo ut nec dormiens cessaret à frequentibus precibus , quibus perpetim invigilabat : Et jam tum rapi se apertissimè animadvertit ad premenda heroica vestigia

San-

Sanctæ Catharinæ Senensis, quæ
duce quinquennis Rosa liliū Vir-
ginitatis Deo consecravit sponsio-
ne solenni: & mox capillos inscia
matre sibi abscidit ad vivam usque
cutem. Divinus hic ardor puel-
lam invasit sub ipsum usum rationis
diluculum, ut affirmant illius ani-
mæ moderatores, qui omnes testa-
ti deinde sunt, nunquam illam à
recto tramite gravioris admissione
criminis aberrasse. Ex eo jam tem-
pore cælestem, quam exequemur,
vitam aggressa est: nec illi quid-
quam se unquam objecit, quod
eam à concepta religione, officio-
que deduceret.

CAPUT II.

Rosæ erga parentes mira obedientia, pietas, sollicitudo.

QUOD à parentum æquis imperiis ne latum quidem unguem deflexerit Rosa, sit ordinariæ virtutis; erit tamen prodigiosæ, quod fuerit divini, humanique obsequii retinentissima, cum pugnantia inter se Deus, ac genitrix imperarent. Hæc filiam vexabat in dies, ut nativam oris pulchritudinem fuco magis intenderet; at illam alto muliebris mundi contemptu insultare seculi genio docebat Deus. Capiti aliquando circumdare compulsæ fertum vario florum genere contextum, illi ab ima parte suffixit oblongam acum, adeoque corollam capiti validè im-

imprescit, ut aliena manu contentis viribus fuerit extrahenda. Chirotecas, quæ delicati candoris elegantiam augerent, induit jubente matre; sed primò dirigit, amburi dein manus experta, flammæ etiam ex odoratis pellibus promicare vidit, totum nocte intempesta cubiculum illuminantes. Ne ad nobilium foeminarum domos deduceretur, clam Indico pipere, quod mordacissimum est, supercilia, & palpebras sibi obliniebat, ut arderent oculi, ruberent, stillarent, idcirco impares publicæ luci ferendæ, potiore ducens oculorum pupillâ solitudinem, quam tanto pretio emptam genitrix illi tandem indulgit, sicut & rudem ac decolorem saccum ex obvia, vilique materia, quam pro amictu induit mirum in modum exultans. Vel ergo matrem infimis precibus exorabat, ut sibi liceret cruentis

Di-

Divini Sponsi vestigijs insistere: vel
mitia imperia ingeniosè eludebat:
veluti cum iussa, non lignis, at la-
nâ farcire cervical, lanæ vim tan-
tam operosè stipavit, ut ligno ca-
put videretur inniti. Quid quod
non matri solùm, sine cuius venia
nec bibebat, nec muliebres labo-
res aggrediebatur, sed & domesti-
co mancipio alacris obtempera-
bat, præcipuè v: rò cum ardua im-
perabantur. Cum mater non rarò
subirata veniam libandæ aquæ Ro-
sæ denegaret, inscia, filiam nun-
quam bibere, nisi ipsa annuisset,
in sex & plures dies Virgo fraudaba-
bat sitim. Hispidas aliquando pel-
liculas, quæ vim frigoris propul-
sarent, Rosæ manibus ex morbo
contractis incauta mater admovit,
addito imperio, ne illas abiiceret.
Toleravit obstinato silentio Rosæ
plurimos dies mordacem pellium
ardorem, quo accensæ manus tur-
gi-

gidis undique tuberculis ulceratæ sunt. Quin & post mortem à religioso Cœnobij Præside iussa Rosæ imago argentum diu multumque frustra quæsitum mensæ superimponere, imposuit illico, animante mortuos colores obtemperandi studio. Quæ verò cætera illius in parentes observantia, pietas, amor? Exhausta viribus ad mediam usque noctem laborem protrahebat, ut illorum egestati consuleret: & licet duodecim quotidie horas divinis alloquijs consecraret, tot muliebria pensa quotidie conficiebat, quot alia quævis celerissima vix quatrIduo: eaque tantâ elegantia, & curâ, ut humanam artem superare viderentur; quanvis non rarò dum flores acu pingeret, animo à sensibus avvocato divina intueretur. Ad hæc alebat in horto violas, ex quibus venum expositis aliquod lucrum parenti-

bus accederet : & Sponsum cælestem aliunde miris , & arcanis modis supplere solitum candidè confessæ est religioso viro . At si fortè parentes ægroti decumberent , lecto assidebat insomnis , parabat pharmaca , peragebat omnia operosissima Virgo , ut solatium illis afferret . Hic præterire non debeo prodigiosam lætitiâ , quam ipsa moriens dolenti matri , ac secum exanimandæ impetravit , tanta enim cælestis dulcedinis ubertas maternum pectus inundavit , ut jurejurando fassa sit , imparem se gaudio insolito perferendo plurimos dies jucundissimè laborasse , & hoc argumentò manifestè assequutam , quantopere fluminis impetus exhilarans civitatem Dei Rosam suam recrearet.

C A P U T I I I.

*Rosa, ut sequatur vestigia Sanctæ
Catharinæ Senensis, Tertio
Sancti Dominici Ordini
adscribitur.*

OUi sanctissimam Virginem
Catharinam Senensem cum
Rosa nostra componat, incertus
animi sit, Indicumne hunc florem,
an ex Italia translatum in Peru-
viam dicat; usque adeo Rosa susce-
ptum à Catharina institutum vitæ,
mores integerrimos, benevolentis-
simi Numinis dona, & ipsa tandem
lineamenta vultus expressit. Con-
nubij, cui nobili, & honestissimo
destinabatur, spem amputare visa
est simul cum suis capillis. Sed
egregia formæ venustas, acre judi-
cium, suavitas erectæ indolis, ele-
gantissimi mores sancto Virginis

consilio adversabantur. Roseum illa candorem jejunijs deterere: nativam pulcherrimi vultus gratiam omni arte abolere: manus, quarum candor, & pulchritudo commendabatur, viva calce amburere: ne hominum placeret obtutibus, domi latere: adeo ut aliquando Cantam deducta, locum metalli fodinis nobilem, quadriennio nunquam pedem extra limen extulerit, ne semel quidem videre dignata vicinum deliciarum hortum, aut percelebre spectaculum molium Indicarum. Plures nihilominus invita accendit ambitu honestissimi thalami: ac præcipuè matrona genere, & opibus clara, illam unico filio suo sponfam optabat: & gratissimum hoc erat Rosæ parentibus, ac fratribus, qui urbanæ munditiæ, ac elegantiae apprimè deditam illam volebant: & nuptiarum nomine exanimatam, probris, con-

vicijs, alapis, calcibus impetebant, veluti Lapa mater S. Catharinam, cuius ad instar Rosa injurijs omnibus æquissimo animo devoratis, in S. Dominici viridarium tandem insita fuit, adscripta Tertiæ sanctissimi Patris familiæ. Licet illam invitassent Cœnobია nobilissima: optasset S. Archiepiscopus Turibius, ab illa præcipuè sacræ domus, quæ tunc surgebat, fundamenta poni, Rosa studiosa sequi Seraphicæ magistræ suæ Catharinæ Senensis exemplar, quam quinquennis elegerat, vitæ instituto, moribus, habitu repræsentandam; ne tamen suo consilio nimium tribuere, & parum sapientum viro-
rum arbitrio videretur, in viam se aliquando dederat Sanctissimæ Incarnationis Monasterium ingressura. At cum ultimum vale diceret Rosariano Sacello Deiparæ, visa est ut rupes adnasci solo, & fru-

stra in pedes exilire tentavit , advocato sæpius ad opem ferendam germano fratre , contentisque viribus conniso ; quòadusque decreto regressu ad domesticas latebras , alacritate mira surrexit . Alio prodigio Deus ad premenda Catharinæ vestigia Rosam invitavit ; nam ex papilionibus , qui colorum varietate mirabiles Limanum agrum pervolitant , unus nigro tantum , alboque colore pulcherrimè striatus , circumvolitavit Rosam , quæ divinum hoc esse responsum intellexit , ut , velut animo dudum agitaverat , Prædicatorij Ordinis tertium habitum susciperet . Ab illo semel induto vix non dimovit Rosam modestissimi animi demissio ; nam gliscente eius nominis celebritate , cœpit monstrari digitis , notari oculis , laudari à prætereuntibus , ipsique Divæ Catharinæ Senensi non rarò com-

comparari . Et meritò , nam adeo sanctæ magistræ suæ virtutes induit , ut semel tacitè miranti Confessario visa fuerit specie , vultu , lineamentis sic transformata , ut viva similitudine ipsam Sanctæ Catharinæ Senensis effigiem referret . Demum , quæ tam carò illi steterat , vestem constanter retinuit ; nam dum latendi studium illam seponendam suggererat , ad aram Sanctissimi Rosarij flexis humi genibus inter orandum placidissimo animi deliquio sensim dirigit , visa ab adstantibus primò exalbescere pallore niveo , mox decora suffusione rubescere , demum toto vultu lucescere , ac radiare : suoque colori reddita , erumpentibus ex animo prægestiente verbis , ostendit , se in hoc vitæ instituto divinitus confirmatam .

CAPUT IU.

*Rosa mira animi submissio, vir-
gineus candor, benigni-
tas, aliaeque vir-
tutes.*

FVndamentum reliquarum vir-
tutum modestissimi animi sub-
missio tam altas in hac Virgine
radices egit, ut suum unicè con-
temptum perpetuo studio quæsi-
visse visa fuerit. Parum illi fuisset,
domesticæ ancillæ officio di-
stineri, nisi & infra illam se demi-
sisset. Quamobrem sæpe Maria-
nam agrestem servam adigebat, ut
se dejectam humi pedibus procul-
caret. Exultabat injurijs proscif-
sa ob singularem vitæ rigorem; at
suis laudibus vulnerata spineam
coronam, qua tempora clam ob-
federat, violento pugno capiti al-
tius

tius infligebat. A Regio Quæstore, qui à supremis tribus Rosæ annis suam domum consecrari ambivit, flexis poplitibus aquæ libandæ veniam impetrabat. Morbos cælare consueta, ne medicæ sibi manus, & delicata remedia adhiberentur, aliquando tamen candidè fatebatur, quantis cruciatibus distabesceret, ut crederetur ob immania crimina à vindice Numine flagellari. Quin & mirari se, cur nondum terram infælicem, quæ suis piaculis onerabatur, subverterit ultor Deus, sanctè affirmabat. Et enormium quidem scelerum ream illam credidisses, cum obruta lachrymis, & singultans procumbebat ad Sacerdotum pedes. Sed illa nunquam lethali crimine amisit haustam à sacro fonte divinorum munerum ubertatem, & laborandum Confessarijs erat investigantibus, quid ad suum

forum certò spectaret . Vestigium illi contumaciæ inerat nullum : mortalium nulli quæstionem intendit : nullum ab illius ore verbum excidit criticum : nihil in eius moribus mæstum , nihil austerum ; sed tota serena erat , & benigna , adeo ut negasses Rosam esse , quæ spinis carebat . Non erat in illa tristis , & horrida sapientia , sed mira facilitas , quæ tamen nihil de morum gravitate detrahebat : cumque integerrimo singulos amore complecteretur , à Dei hominumque charitate animari videbatur . Nulla rerum humanarum cura eius animum sollicitavit ; quin interrogata aliquando , num qua re præter divinas delicias innocuè caperetur , negavit se posse rebus perituris exhilarari . Non modò nunquam carnis tyrannidem sensit , sed & virgineum illius candorem nulla unquam veniali

ma-

macula decoloratum fuisse, ac in
roto vitæ cursu ne semel quidem il-
li in animum impuram cogitatio-
nem obrepisse jurati affirmaverunt
undecim Religiosi viri, quotquot
generalem Virginis Confessionem
exceperunt. Postquam egregiam
formam assiduis verberibus, diutur-
nâ inediâ, & aquâ gelidâ toti cor-
pori creberrimè superfusâ, corru-
pit, magno haberi cœpit in pretio,
utque innocentissimum pœnitentię
simulacrum ab omnibus indigitari.
At illa blandientis fāmæ laudes
horrescens, vividum illico in ge-
nas colorem, vigorem in oculos
precibus revocavit; adeo ut cum
domum rediret sub meridiem sex-
tæ feriæ sanctioris hebdomadæ ro-
seo vultu instar auroræ subvivida,
& amœna, congerones quidam
juvenes audacissimi in prætereun-
tem jocati sint, quasi reducem à
convivio, & opiparè habitam. Illa

verò quadraginta elapsos dies pane tantum, & aquâ duraverat: & horastunc triginta immota perstiterat in Templo Sancti Dominici precibus insistens, cibique omnis expers, ac potus. Majus illi studium fuit premendi reliquas divinas dotes, ideoque Deum à teneris annis flagitaverat, ne cui mortalium fineret innotescere, quæ suum intra animum operari dignaretur, cumque illius votis annuerit Sponsus divinus, perpauca, & penè vulgaria crediderim, quæ, ut maxima, & singularia, spirituales Virginis Patres ab illa expiscari potuerunt. Quid quod Superos habuit ministros modestiæ suæ, & cum aliquando templum ingressam consternasset subita recordatio destituti in patenti cubiculo severioris ad domandum corpusculum instrumenti, designavit animo locum, in quo illud suppressi

à

à Cæli Regina exoptabat , ut domesticos lateret , & regressa reperit famularem suæ demissioni præstitam operam à Superûm Imperatrice .

C A P U T U.

Rosæ mira inedia , prodigiosa jejunia : Eadem tenerum corpus cilicijs , flagris, catenis donat.

L Aboraret , opinor , historiæ fides , prodigiosa Rosæ jejunia recensendo , nisi Lector admoneretur , Compendium hoc , quo sanctissimæ Virginis Vita delineatur , à remissoriali , vt dicunt , processu fide bonâ extractum fuisse . Rosa profectò per D. Catharinæ Senensis vestigia mirabili se inedia cru-

cruciavit. Penè infans omni sibi fructuum esu interdixit, qui suavissimi in Peruvia nascuntur. Sexennis tres hebdomadae dies nihil præter panem & aquam degustare cœpit. Anno verò ætatis quintodecimo se obstrinxit voto nunquam delibandi carnem, nisi adigeretur illorum imperio, quibus non obtemperare nefas fuisset; quod si aliquando indicebatur, maximo stomachi supplicio pœnas dabat virtutis eximiæ, & non rarò nauseantem ardentissima febris invasit. Quoties verò iam lecto defixam delicatis edulijs ad salutem revocare tentarunt, in manifestum vitæ discrimen adduxere; cum contra panis frustulum aquæ infusum præsentissimam illi sanitatem sæpenu-mero reposuerit. Quod prodigium nulli admirationem incutiat; nam Christus ipse Rosam docuerat, velle se ab illa rigidis ined-

diæ

dix exercitijs constanter honorari.
At mater nimiam in exanguis filix
vultu maciem conspicata, hanc
parsimoniam grande vocabat in-
crimen. Jussa proinde Rosa com-
muni mensæ accumbere, ancillam
rogavit, ut ex panis frustulo, &
herbarum pugillo sibi pararet of-
fam nullo sale conditam. Sed quas
herbas sibi Virgo legebat, ama-
rissimæ erant, & agresti saporis
malignitate torquebant palatum.
Has illa è vicina sylva petitas ale-
bat in horto studiosè, cuius sub
sepibus vasculum abdiderat ver-
vecino felle plenum, & hoc cibos
aspergere, & os quotidie summo
mane solita erat imbuerè. Gra-
nadillæ, quo in flore mirabili per-
ennant instrumenta cædis divinæ,
amarissimæ frondes dulcem illi,
& quotidianum saporem elabora-
bant. Dubitari ergo meritò po-
test, duriusne illi à talibus cibis,

an

an ab ipsa inedia tormentum esset .
Duplici se torquebat jejuniorum
genere , & quo semel tantum in
die tenue panis , & aquæ solatium
delibabat , & quo per totum
diem , noctemque penitus gusta-
bat nihil . Primum ferè quotidia-
num præsertim ultimis vitæ annis
religiosius ab illa servabatur se-
ptem continuos menses , à festo
Exaltatæ Sanctæ Crucis usque ad
Dominicam Resurrectionem . At
ineunte cinerali jejunio , seu Qua-
dragesima , omnem sibi subtrahe-
bat panem , solis malorum aureo-
rum seminibus parcissimè victitans ,
ijsque tantum quinque , dum sex-
ta feria recurreret . Reliquo anni
tempore , quod octo diebus absu-
mebat , vix unica die tolerandæ vi-
tæ sat esse credebatur . Unico pa-
ne , illoque sat exiguo , & aquæ vas-
culo quinquaginta dies aliquan-
do transegit : aliaque vice idem
spa-

spatium decurrit ne guttulâ quidem aquæ recreata. Supremis annis trans mittebat complures dies sine omni prorsus alimento. Feriâ quintâ se includens in domestico Oratorio, nec inde ad Sabbatum usque digressa protrahebat triduum omnino infomnis, impransa, incænata, & uni angulo affixa, omnino impos ab illo vel ad momentum surgere, & in contemplationem rerum divinarum toto pectore incumbens. Quid quod octo solidos dies nullum præter divinam Eucharistiam alimentum admisit. Vulgare sit, aquæ ipsius haustu gustum fraudasse, transactis hebdomadis quampluribus sine potu, & cæteroqui haustâ non aquâ gelidâ, sed plerumque calenti. Prodigiosum est, plus virium à jejunijs accepisse, quàm à cibo, eò quod cum sua Magistra Catharina vulnerati Christi lateris ambrosiam degusta-

stabat. Prodigio quoque simile est, superfuisse in arido corpore locum, qui flagella exciperet, sanguinem, qui verbera sequeretur. At nisi per Confessarios modus illi fuisset impositus, mortem nimium properasset ardor corporis castigandi. Postquam Sanctæ Catharinæ habitum induit, non contenta vulgaribus funiculis, duas sibi catenas ferreas aptavit in flagrum, quibus per noctes singulas ita se cruentabat, ut sanguinis rivi parietes, & pavementum aspergerent: præcipuè ut scelesti meliorem ad frugem revocarentur quot flagellorum sulcis, quot vibicum livoribus se in dies exarabat! ita vulnera dispensans per diversas corporis partes, ut dum una coalesceret, altera feriretur, iterumque sæviret in primam vix dum coalitam, ab hac alterna, crudelique vicissitudine dirissime cruci-

ciata . Horrebant domestici ex ædium parte secreta plagarum strepitum audientes latè sonorum, quique Rosæ animum moderabatur, temperari nimium rigorem, iussit; sed illa infimis ab eo precibus extorsit, ut liceret sibi intra aliquot paucos dies quinque mille ictus infligere . Serijs ab infantia præludijs ostenderat, quàm avidè in hæc poenitentiae exercitamenta ferretur, nam & quadriennis sub crudorum laterum, & gravis trunci pondere sæpè laborabat, & Marianam ancillam precibus adigebat, ut se in horti angulo orantem gravissimis ponderibus oneraret, sub quibus æstuabat, gemebat, & interdum victa premebatur ad solum . At nondum quartumdecimum annum egressa sæpè nocte concubia perambulabat hortum nudipes, oblongam crucem lividis humeris gestans, nec illi

tunc

tunc auræ malignæ intemperies ,
nec frigora , nec ventorum turbi-
nes insuaves erant . Jussa flagellis ,
non ferrea catena se cædere , ip-
sam catenam lumbis triplicato cir-
cumductu validissimè adstrinxit ,
& serâ commissuræ angulis immis-
sâ , clavem eò projecit , unde re-
dire non posset . Cum verò per
extritam pellem in carnis , & ner-
vorum profunda ferrum penetras-
set , jamque conssepultum prope-
modum esset , nocte quadam acu-
tissimus coxendicum dolor Ro-
sam invasit , à quo , vires identi-
dem accipiente , mōx Virgo in-
terempta fuisset , namque cate-
nam vi nulla aperire poterat , diu
multùmque frustra luctata ; sed il-
la confugit ad preces , quæ Cæ-
lum ipsum aperiunt : & ecce sera
sponte dissilit , laxatur catena ,
diducitur ; avulsione tamen opus
fuit , quam cutis , & cruor seque-
ba-

batur. Ubi primùm vulnera coiverant, suo se iterum tormento Rosa incinxit; sed catenam carni rursus adnatam sibi transmitti Confessarius imperavit, & illius aliquot circuli post Rosæ obitum conservati mirabilem spirarunt odorem, & omnibus peregrinum. Laceratis arctissima vincula circumdedit, quæ perpetim torquebant musculos complicatos: pectus, axillas, latera morfu creberrimo vexarunt minuti sentes, & urticarum manipuli. At cilicium nacta ex acutis equorum setis densè contextum, infra genua productum, quod præ crassitudine complicari vix poterat, triumphavit sub illo rigoris paludamento, idemque infixis undique brevissimis acubus in se violentius armavit. Hoc usque complures annos, & ob frequentem sanguinis vomitum alieno tandem imperio exuere coacta, faccum

cum villis crassissimis gravem sibi in formam induſij aptavit: quo sub pondere æſtuabat, rigeſcit, laſſabatur extenuata viribus Virgo, & poena illi erat quicunque motus plumbeo pondere prægravatæ. Plantis, in quibus tantum à vertice capitis erat ſanitas, quoties domi clibanus accendebatur, calcabat immota fornacis orificium, unde vehementior incendiij vis erumpebat. Hiſce delicijs demulcebat corpus, cui ſat poenarum afferebat crebra ægrotatio, exoptans etiam tentare majora, niſi vetuiſſent animæ moderatores. Quid quod ad cæteram in ſe inhumanitatem illud etiam additum ab ipſa fuit, ut neque delicias ſpiritus in corpus exundare ſineret, cavens, ac totis viribus obſtans, ne divinis epulis animum ſaginantibus reficeretur: quod ego divortium ſublimibus Roſæ operibus adnume-

randum reor. Hoc unum solita
erat reponere culpantibus nimium
in se rigorem: sinerent ipsam,
quando nil boni operaretur, sal-
tem mala tolerare.

C A P U T U I.

*Rosa capiti aculeatam coronam in-
figit: eiusdem lectulus, cer-
vical, nocturnæ vi-
gilie.*

S Pineæ sepes Rosam decebat,
quæ dies, & noctes hærens in
plicatili senticeto, quod Christi
verticem insedit, in egressu pue-
ritiæ ex ductili stanno sibi coro-
nam implicuit, additis claviculis
introrsus præacutis, & hoc diade-
mate sibi caput incinxit non sine
vulnere. Plures annos duravit sub
hoc spineto, quod tamen prælu-
dium solum fuit severioris tor-
men-

menti, imminhentis ex secunda corona aculeis nonaginta novem armata . Hanc postremos decem annos ad finem usque vitæ prodigiosâ constantiâ toleravit ; neque enim sine spinea corona D. Catharinæ Senensis habitum induisse sibi videbatur . Argenteam laminam flexit in circulum , illicque tres introrsus infixit aculeorum ordines , tam firmiter suo quemque loco inherentes , ut Aurifex adhibitis forcipibus evellere nullum potuerit . Dentatum hoc sertum quàm dirè momordit velatum puellæ caput ! præsertim cum spinæ non omnes simul , sed aliæ post alias successione molestissima cutem invaderent ; utpote ex varietate motuum in singulis vulnerum angustijs obliquatæ . Sermo ipse Virgini dolorificus erat : quid si tussî concutiebatur pectus, si caput sternutamento exonerabatur ? Sed hæc

illi

illi ludicra videbantur , ideoque
ubi coronæ extrema coibant , vit-
tas innexuit , quas contentis viri-
bus attrahens dolorem intenderet ,
aculeos altius capiti infigans : ne-
que unquam eodem , quo pridie
steterat , loco figebat diadema
suum , ut immitius pungeret , in-
que intacto pœnam renovaret .
Sextâ verò feriâ se profundius sauci-
abat , ad imum usque sinciput ,
& auricularum cartilagines coro-
nam demittens . Diu matrem , ac
domesticos latuit efferum hoc tor-
menti genus , & artes , quibus
illud in se Rosa atrocius irritabat .
Sed cum aliquando se blandè in-
terposuisset Patri quærenti ad vir-
gas puerulum filium , fortuito er-
rore in illius caput patris manus
incurrit , ac tres illico sanguinis
rivos explicuit , ex quo coniecit
mater , quâ lis herinaceus sub can-
dido ejus velamine nidularetur .

Quoties tartareus hostis Virginem aggrediebatur, ter illa digito pul-
sabat coronam suam, quæ validius
fronti impressa certam ei victo-
riam afferebat. At post Rosæ in-
teritum sanctus vir suaviatus coro-
nam, prodigiosum in se divini amo-
ris incendium repentè accendi,
& odore suavissimo perfundi se,
expertus est. Ut autem spinosum
Sanctæ Catharinæ Senensis exem-
plar Rosa nostra secuta est, ita cum
flores deessent, quibus de more
virgineum demortuæ caput orna-
retur, Catharinæ simulacrum suum
illi diadema commodavit, in ar-
gumentum immortalis triumphi,
quo excipi ab eadem Virgine, &
à pulcherrimo comitatu deduci ad
solum Divinitatis, manu præfe-
rens palmam, & à Deipara coronâ
decorari, visa est à nonnullis pro-
batissimæ sanctitatis. Sed redeamus
ad poenas, quibus Rosa triumphos
sibi

sibi adornavit . Eam strati sui voluit esse dūritiem , quæ somnum abigeret, non invitaret; immo idem lectulus , & equuleus esset . Vix obrepserat matri sopor , cum Virgo , remota culcitæ parte , cui incubuerat , in substratam tabulam descendebat. At capiti rude saxum supponere tandiu perstitit , quousque ab irata matre veniam extorsit suo sibi arbitrio lectum contabulandi . Truncus hic fuit undique impositus , ac lapilli sub vili stragulo dispositi , ut ea inæqualitate læderent corpus , cui læves tabulas in deliciis fore timebatur . Postea verò tria ligna tortuosa , indolata , nodosa tabulis imposuit : ac tandem ligna omnino septem certis intervallis distinxit , ac tercentum præacutis tegularum fragmentis intercapedines implevit , quorum mucrones obverterentur corpori : & in hoc prato

quiescebat Rosa. Ponè ad lectuli caput amphoram appenderat felle plenam, quo antequam ad somnum sese componeret, fauces recreabat in memoriam Sponsi felle potati. Cervical primò fuit crassioris panni volumen incommodum, crudus deinde later, mox lapis undique scaber. At à matre iussa pulvinar adhibere, non illud lanâ, sed ingenti vi segmentorum infarlit: lanam ingeri mater præcepit: obtemperavit Rosa: sed lanæ vim tantam stipavit, ut ligneum cervical videretur: & sub parte, à qua facies decumbentis excipienda erat, tortiles juncos occuluit. Quindecim ipsos annos fugitivum soporem super horribile stratum, quod ultimo loco delineavimus, Rosa carpsit, sensu doloris tam effero, ut ad illius cogitatum, cæteroqui generosissima, tremere, æstuarer: certa, non inde
fe

se sine omnium membrorum gelido stupore , ac veluti ex ossifragio surrecturam . Exanimem aliquando confirmavit Christus manifesta , blandaque specie , duriorē fuisse dicens Calvariae lectulum , in quo pro illa coeperat mortis somnum . Tandem qui præerant Virginis animo mitius illam ad soporem componi pro imperio adegerunt , abjectis saltem fragmentis tegularum . Ultimis vitæ annis plerunq; in humili sella collecto corpusculo noctem transegit , ex nocturnis frigoribus tremens , ac rigens . Et hoc novercale corporis odium illam edocuit , ut nec unquam vigil pulvino insideret ; sed vel stans perageret labores suos , vel transverso palo pro sellula uteretur . Sed nec morti vicinam destituit hic ardor durissimè cubandi . Equuleum suum frustra quæsit : in nudo pavimento deponi non im-

petravit: at saltem lecticæ tabulis occipite, humerisque acclinis in duro ligno voluit qualitercunque commori Sponso Crucifixo. Nec defuerunt, qui in morientis pallido vultu notarint ipsam Christi in Cruce expirantis effigiem, quod aliàs in Sancta Catharina Senensi animadversum fuit. Quantum verò vigiliis dabat, cui lectus ipse soporem adimebat! Horas illas duas, neque semper integras, somno indulgit, reliquum tempus ita distribuens, ut ex diurno, nocturnoque duodecim quotidie horas orationi seponeret, alias impenderet foemineis laboribus, quibus parentes alebat: cumque inedia, cilicij, lectique tormentum, calidæ potus, profunda meditatio divinorum, vigilandi facilitatem ei comparassent; versutus tamen hostis illam revocare nitebatur ad somnum. At Rosa vel cervicem,
illi-

illidebat parieti : vel sibi tunde-
 latera : vel prominentibus ex li-
 gneæ crucis brachijs fortibus cla-
 vis manus applicabat, & pendulum
 corpusculum librabat in aere : vel
 oblongo, quem in cellulæ pariete
 clavum fixerat, modicum capilli-
 tium, residuum in fronte ad obte-
 gendam spineam coronam, imple-
 tebat arctissimè : & pendula, vix
 summis aliquando pedum digitis
 terræ insistens, clavis in soporem
 pugnabat, de quo non satis adhi-
 bitis in lecto tribulis triumphave-
 rat.

CAPUT VII.

*Rosa domestica solitudo, fuga
publici, cellula per-
angusta.*

A Prima infantia solitarios angulos domi quærebat procul à ludis puerilibus, ut uni vacaret Deo. Crescente verò cum annis studio latendi, in horto sub umbrosis platanis flexili ramorum, palmitum, ac virgultorum circumductu, modicum incluserat spatium, in quo ad humile altariolum totas hærebat dies, adeo ut domi abiverit in proverbium: hortum adeas, si Rosam quæris. At grandior impetravit à matre aliud intra ædes cubiculum, in quo seorsum ab omnibus pernoctaret. Molestissimum illi erat, in publico apparere, & nunc prece, nunc lachrymis.

mis ambiebat matrem , ut optatissimam sibi solitudinem indulgeret . Aliquando ad obeunda urbanarum salutationum officia evocata , juxta domesticum furnum transiens , à clibani orificio saxum studiosè sibi attraxit in pedem, ut eo vulnere claudicans, nec idoneis ad insistendum pedibus , domi fineretur . Eo præcipuè nomine frequentiam oderat , quòd suavis odor virtutum suarum commendaverat illam apud omnes , velut illustris foeminam sanctitatis . Igitur aspirante Numine indagavit viam , qua se ab impedimentis viriliter explicaret . Coronam præcariam ex coralliis, quam habebat in paupere thesauro , curavit, Deiparæ Virginis collo circumdari , cui à Rosario nomen , & cultus est ; ut hoc vinculo suaviter illaqueata Regina sua Rosæ Matrem pertraheret , quò filiæ erat

in votis . Post aliquot dies cum
Rosa Deum intenta supplicatione
propitiare non destitisset , visa est
corona à Virginis collo soluta pen-
dere de manu parvuli Jesu , atto-
nito ad hæc Ædituo , qui profite-
batur , à nullo mortalium in digitos
Filioli fuisse translata . At Rosa
tacita interpres divini consilii exul-
tabat intelligens , desponsum sibi
à sua Diva quod munus optabat:&
Filium pro Matre fidejubentem
sponsionis vinculum in se transtu-
lisse: ideoque voti secura flagitavit
à matre cellulam perangustam , in
qua sine permissu illius , qui suæ
animæ præerat , nullius conspe-
ctum admitteret , aut alloquium .
Intra paucos dies perfectum stetit
arctissimum in horto tuguriolum ,
quinque pedes porrectum in lon-
gum , quatuor in latum ; ut ut angu-
stum , sibi tamen , dicebat Rosa ,
Sponsoque cælesti sufficiens . Hic
post-

postquam sese inclusit, cuidam probatæ sanctitatis foemine in celesti raptu visa est sub specie lucidissimæ stellæ, cujus radios opaca parietum angustia cohibere non poterat. Hic perpetuos hærebat dies, per varia pietatis exercitia dispensans horas, ignara propemodum, in corpore ne degeret, an extra corpus. Cumque à nonnullis interrogaretur, cur non inde quotidie prodiret, ut Missæ sacrificio adesset, candidissimè respondit, domesticis curis distineri aliquando matrem, sine qua domo prodire non poterat; sibi tamen à Divino Sponso consultum, ut in cella residens plures Sacerdotes perlitantes quotidie videret, audiretque. Compertum deinde est, divinitus Virgini datum fuisse, ut spiritu, non secus ac si corpore præsens adfuisset, interesset omnibus Sacris, quotquot in vicinis

nis templis offerebantur . Prodigiosum porrò fuit obsequium à culicibus exhibitum solitariae Rosæ . Innumera illorum agmina soli humiditas, & arborum frequentia aut gignebat, aut pertrahebat in Virginis cellam, amicum suo generi umbraculum : præcipuè ubi sub meridiem radii solis ardentes, aut sub vesperum ferenæ noctis algores tenuissimis corpusculis imminébant : nec tamen in tot culicum legionibus, quibus scatebant undique parietes, personabat ostium, fenestra implebatur, vel unicus fuit, qui Rosam unquam attingeret; cum contra matrem, aliasque religiosas foeminas ex permisso Rosam invisentes, hostiliter invaderet exercitus molestissimus. Neque tantùm hospitæ suæ parcebant, sed ad illius imperium in omnia sese flectebant obsequia culices ingeniosi . Ubi primùm

Virgo

Virgo referabat cellulæ portam ;
 Eja , dicebat , amici , laudes cele-
 bremus omnipotentis Dei ; at illi
 concentu lenissimo sparsi in gyros
 arguta miscebant murmura , pha-
 lange tam ordinata , ac in se flexi-
 bus aptissimis redeunte , ut cho-
 rum credidisses , cui ratio dux præ-
 fideret . Cumque noctu repeterent
 hospitalem domum , rursus oran-
 tem Rosam gestiebat æmulari vo-
 latilis harmonia : & cum illa de-
 inde sub lege nocturni silentii con-
 ticescere . Accidit aliquando , ut
 Catharina de Sancta Maria Tertiæ
 Ordinis Sancti Dominici in ere-
 mo domestica Rosam inviseret :
 hæc à culicibus sauciata , unum
 quem sanguine turgidum vidit ,
 occidit . At Rosa miranti similis ,
 cur hospites , inquit , meos truci-
 das , nec tantillum animal tuo pas-
 cis sanguine , dum ejus Conditor
 suo nos toties recreavit ? Sed in po-
 ste-

sterum tecum illi, ut mecum, pacem colent. Huic augurio fides stetit; nanque illi, aliisque pepercit in posterum culicum exercitus, adactus admirando Rosæ imperio. Franciscam verò de Montoya Tertiariam itidem Sancti Dominici alumnam à tribus tantum culicibus appeti in Sanctissime Trinitatis honorem blandè permisit. Ultimo vitæ suæ triennio in Gundisalvi de la Massa Quæstoris Regii domo pacem ferme solitudinem sibi Virgo statuit, jussa à parentibus obtemperare viro religiosissimo, qui suas ædes Rosæ hospitio ambiverat consecrari: hinc totas cum diebus noctes in domestico latebat Oratorio, vel in ultimo ædium cubiculo, identidem regressa ad hortensem cretum, perpetuo studio sequuta solitudinem, cujus amore tantopere tenebatur Magistra sua Catharina, Senensis.

CAPUT UIII.

*Rosæ cum Christo mira desponsa-
tio, Pronuba Augustissima
Imperatrice Ange-
lorum.*

D Idicerat quidem Rosæ, Sera-
phicam Magistram suam,
Christo desponsam; sed vix aude-
bat exoptare locum inter Sponsæ
comites adolescentulas. Interea
tamen candorem Angelicum, &
profundissimam dehiscientis ani-
mi submissionem adornabat, do-
tem scilicet, Sponsi divini amores
rapientem. Prodigiiis ad myste-
rium præparata, & ad consensum
erecta fuit modestissima Virgo;
nam primò bicolor illè papilio, de
quo verba supra fecimus, ali-
quandiu per sinistram Virginis
latus oberrasset, constitit. è
re-

regione cordis, ibique depictam. reliquit imaginem cordis in veste Rosæ pulcherrimè delineatam, perinde ac si: Præbe mihi cor tuum, Sponsus Divinus clamaret, & Rosam insigniret eodem emblemate permutati eum illa cordis, ut olim cum Catharina. Nocte quadam Speciosus forma præ filiis hominum videndum se Rosæ præbuit, & candidissimum illius amorem sequerere professus, innumeras Virgines splendido amictu nobiles ostendit, quæ cædendis marmoribus distinebantur, ad illarum confortium Rosam invitans, inter sponsas suas, arduis virtutis operibus infudantes, annumerandam. At Rosa veste gemmis, auroque distincta se repentè inclaruissè vidit, & ad cælestem sortem elatam. Sed festinat historia ad manifestum munus, quo Christus vigilanti Rosam ad connubialem thalamum.

lamum invitavit. Dies aderat consecrata triumpho Divini Regis Hierosolymam ingressi: cumque palmæ distribuerentur in Templo, sola Rosa præterita fuit ab Ædilituo properante: sive id casu contigerit, sive Numinis consilio singulari; ut Virgo novitate confusa timeret, ne obliquo forsitan animi motui inscia succubuisset. Ad Deiparæ sacellum, cujus præcipua tenebatur religione, confugit, & genibus innixa per undantes lachrymas faucium cor suum effudit. Cum ecce Virginem videt sibi sereno, mitiq; vultu blandientem, mox in Filium conversam, & inde veluti fausto oraculo excepto in se rursus intentant. Rosa ignoto perculsa gaudio Puerum intuetur, qui pariter illi suavissimè arridebat, & postquam aliquandiu miro sensu voluptatis suam Sponsam perfudit, in hæc aper-

apertè verba prorupit : Rosa cordis mei , tu mihi Sponsa esto . At illa mirum in modum exultans , ac in suum nihilum dehiscens , ancillam se dixit paratam sui Regis ad nutus . Et Virgo Mater : vide , inquit , ò Rosa , eximium favorem , quo te Filius meus dignatus est . Exinde quibus gratiæ thesauris suam Sponsam ditavit **A**mor divinus ! Illa quidem sapienti viro , qui ejus spiritus explorandi partes susceperat , pressius interrogata , dixit , verba sibi deesse , quibus munera liberalissimi Numinis in se immeritam collata explicaret . Ut autem perpetuò sibi versaretur ante oculos tantæ gratiæ monumentum , anulum poposcit à germano fratre suo , qui mysterii omnino inscius , perinde tamen ac si nuptiis interfuisset , eadem verba : Rosa cordis mei , tu mihi sponsa esto : anuli convexo
jussit

jussit inscribi . Hoc Rosa sui amoris pignus ut in arca , in qua servatur divinum Corpus , feria quinta sanctioris hebdomadæ , includeretur , ab Ædituo impetravit . At Paschatis die sponte , ac secretò redivit ad Rosam , non sine novò prodigio ; nanque prope illam innixa mater , & ad omnia intentissima , nihil animadvertit . Post Virginis obitum vir sanctitatis famâ conspicuus manu tenens anulum Rosæ , in mortalium omnium rerum exilium raptus , & miro voluptatis divinæ sensu colliquefcens , Rosam vidit in excelso gloriæ fastigio inter præcipuos Cæli cives prope solium Divinitatis : ac diu loco moveri , & protendere rigentem manum non potuit . Quod si hæc in aliena manu prodigia peperit nuptialis anulus Rosæ , quid ipsas nuptias in anima Sponsæ præstitisse putas ?

CAPUT IX.

*Rosæ perpetuum orandi Numinis
studium.*

STudio precandi, meditandi-
que mirificè Rosa floruit. Ad-
huc infantem Divinus Spiritus ora-
re docuerat, eoque igne succen-
derat, quem nec ipsa nocturna
somnia consopirent. Audita ergo
per noctem sæpissimè est numeratò
reddere preces, quibus per diem
invigilaverat. Crescente verò
cum ætate religione, duodecimo
anno jam Unitivâ, quam dicunt,
Orationis viâ Deo adhærebat.
Porrò duplex illi erat alloquendi
Numinis ratio: tum enim soluto
curis omnibus animo quietissimè
se colligebat ad loquendum cum
Deo: tum inter manuum labores,
& extrema opificia, mentem nihi-
lo.

Iominus affigebat Divinitati. Priori, ut supra innuimus, duodecim quovis naturali die horas seposuerat; posterior illi perpetuus erat, nisi quando per horam horribilibus, ut mox dicemus, imaginibus torquebatur; adeo ut sive dormiret Rosa, sive vigilaret, dum neret, texeret, sericos acu pingeret flores, alios alloqueretur, comederet, legeret, in horto, in arca, ubique locorum, ac gentium, perpetuò obversaretur animæ oculis illius amor Deus. Quodque omnem admirationem supergreditur, divina hæc præsentia ita Rosæ internas facultates occupabat, ut illam ab extimis sensibus non adeo detorqueret. Quocirca respondebat appositè ad omnia: prosequebatur institutum opus: ac domi satagens circa frequens ministerium in remoto cordis thalamo cum Sponso delectabatur. At
in-

inter orandum omnino torpebant illius sensus ad mortalium rerum imagines . Hinc in Templo defixis in aram oculis , nec prætereuntes videbat ; immo nec si aliquid in pupillas incurreret , attrahebat nitu supercilia ; sed veluti rupes immobilis , quo loco , situque ad orandum se composuerat , eodem post horas , post diem integrum , post duas solidas cum die noctes hærebat . Ultimis verò vitæ annis à mane feriæ quintæ ad Sabbatum usque , nonnunquam & ad Dominicum diem in domestico Orationario perseverabat , omnino impos de pavimento surgere . Tres præcipuè in singulos dies horas divina beneficia recolebat : assueverat etiam altissimo generi orandi , quo Dei Attributa centum quinquaginta mente pervolvens , singulis proprium latriæ cultum exhibebat : & hanc precationis formam

ter-

terrori esse Dæmonibus affir-
bat, cui dum insisteret, tota ipsa
movebatur systole, quam dicunt,
cordis, atque diastole. Familia-
res sermones, quibus alios allo-
quebatur, plerunq; sagittæ erant,
quibus ferebatur in Deum: ve-
luti hortum commendatura: Ven-
ustus est, dicebat, ac pulcher:
Deus illi flores adaugeat. Illam
omnia invitabant ad Deum: &
aliquando ægrotam, & viles cibos,
quibus se reficeret, adornantem,
canens avicula in extasim abri-
puit, mortalium omnium obli-
tam, ad vesperam usque ab hora
ante meridiem tertia divino amo-
re vehementius æstuantem. Quid
quod plantas ipsas, mutosque sti-
pites ad laudem, & adorationem
Deo exhibendam Rosa mirabili-
ter inclinabat! Rem affero inau-
ditam. Summo mane cum ad cel-
lam suam reditura pandebat horti

ja-

januam, eminus conspectas arbores, virgulta, herbas, invitabat, ut secum benedicerent Authori suo: & ecce moveri subitò ramos, collidi frondibus frondes, plaudere foliorum susurros, flores ipsos, ac frutices animari in musici murmuris harmoniam: altissimas arbores summo cacumine verrere solum profundæ adorationis ritu solenni. Neque hoc Rosæ prodigium peregrinum, ac raram, sed frequentiam diuturnam conspicuum. Volucres etiam allexit in alternam adorandi Numinis societatem. Anno, qui Rosæ ultimus fuit, per quadraginta solennis jejunii dies sole occiduo advolabat prope illius cubiculum avis mirè vocalis, quam Virgo cantu provocabat ad laudes divinas emodulandas. Illico avicula inchoabat argutam harmoniam, & sensim vocalior assurgens, tum Virgini

cedebat vicem , quæ voce tiæmula ,
 suavissimaque , & ingenio prodi-
 giosè fœcundo hymnos institutos
 prosequēbatur , perque integrum
 labentis horæ spatium alternabant
 cantum ea lege , ut concinente
 Rosa volucris attentissima nec
 pipiret : vixque dato signo sextæ
 postmeridiem horæ perfuncta of-
 ficio avolabat , postridie reditu-
 ra . Alios porrò ad studium ora-
 tionis accendere omni conatu sat-
 egit , præcipuè domesticos : &
 pios libros , quotquot de hoc ar-
 gumento verba faciunt , & lege-
 bat ipsa avidissimè , & legendos
 aliis mirâ eloquentiâ persuadebat .
 Religiosos verò viros , qui sacras
 confessiones excipiebant , ac Dei
 verbi præcones obtestabatur eni-
 xè , ut ad orationem , qua Deum
 mente alloquimur , omni suadela ,
 & arte mortales inducerent : ut
 usum piarum meditationum in po-

pulum inveherent: ut ad frequen-
tandas Dei laudes, præcipuè Ro-
sarium magnæ Virginis percurren-
dum, omnes inflammarent: & mi-
rum quantum hoc exemplum, &
ardens hortatio Rosæ divinum cul-
tum amplificarit.

C A P U T X.

*Rosa funestis visis exercetur, ac
horrendas alterius vitæ pœnas
degustat. Doctorum examen
subit, & ab illis mirum in
modum probatur.*

CUM ad altissimum gradum
perpetui colloquii cum
Deo Rosa ascendisset, atrociam te-
nebrarum intervalla pati cæpit in
dies, quæ solidis plerunque ho-
ris eò miseram deprimebant, ut
sæpe nesciverit, in tartaro ne esset,
an in diro carcere ignis purgantis;
adeo

adeo nulla suavissimi Numinis recordatio, nullum solatii vestigium aderat menti. Accedebat poenarum in cumulum memoria nebulosa præteriti amoris, quo Deo adhæserat aliquando; sed nunc eundem neque cognosci, neque porro diligi à se posse arbitrabatur, immo veluti peregrinum, alienum, vixque famâ notum eminens, & raptim suspiciebat: videbatur muro adamantino obstructum effugium, ut nusquam pateret hujus labyrinthi exitus; quare vix erat, quo ab æterna poena damni suam infelicitatem Virgo secerneret. Tam graue tædium vitæ eandem invadebat, ut triste solatium venaretur à spe proximi interitus, sed tunc animæ immortalitas importunè occurrebat, quæ illam æterno terrore miserè lancinabat. Per ipsos quindecim continuos annos quo-

tidie semel in hanc caliginem demergebatur integrâ ut minimum horâ: iterum tabescebat in malis: insurgebat sibimet displicentis animi tædium: & Rosa tota jam spinea semetipsam sauciabat. Deum ea fuit horribilium figurarum acerbitas, ut Virgo, tametsi ad quidvis ferendum impavida, unicum hunc amarissimum calicem à se transferri enixè petiverit; nam durius illi erat ab amore Domini divelli, quàm interire; cum enim, quod corpori est anima, hoc sit amanti animæ Deus, deerat illi quotidie, abeunte Deo, vita nobilior. Nihil interim de rerum cælestium contemplatione remisit. Vix tandem reperti Theologi, qui de hoc prodigioso mentis angore quidpiam certi præsumerent definire. Fuisse, qui deliria, aut insomnia, qui lemurum spectra, vel dæmonum præ-

præstigias, qui fumantis atræ bilis paroxysmos interpretarentur. At illa omnia modestissimè devorabat, acquiescens in alto providentiæ Divinæ consilio, & incusans inopiam ingenioli sui, quod implexos animi motus explicare non posset. Nitebatur subinde similitudinibus adumbrare dolores suos, qui occupatum animum amarissima cogitatione torquebant; at si ignis nostri cruciatui conferrentur, ridendam esse comparationem, dicebat. Se longè à Deo sitam in regione dissimilitudinis: obrutam pusillanimitate spiritus, & tempestate, de qua loquitur David: Anathema sibi videri à Christo, veluti Paulus optabat: cum demum ab horridis illis imaginibus sibi dolorem inferri, qui millies vitam, animamque sibi rapuisset, nisi prodigiosè à Deo conservata fuisset. Cre-

ditur Sancta Catharina Senensis aliquando idem perpeſſa . De Beato certè Henrico Suſone id compertum tradit hiſtoria . Sæpe illi erat ante oculos Chriſtus iudex vultu aſper , & horrendo tonitru intonans illud : diſcedite maledicti . At compulſa aliquando fateri num poſt tenebroſam noctem Sponſus illuſtraret animum ſuum , ingenuè ſaſſa eſt , illico ruruſus emergere rerum cæleſtium voluntates : totam ſimul animam colluceſcere , & inflammarî , & in ſinum Divinitatis iterum volare : totam ſe transformari in Dilectum ſuum : immobili in Deo radicatam ſibi videri , & illius gratiâ ſolidatam ; adeo ut certò ſciret , quod nihil unquam ſe à Chriſti charitate ſepararet . Quanvis autem arcanum gratiæ lumen certitudinem illi indidiſſet , rectam ſemitam eſſe ,
per

per quam ibat : tamen modestissima Virgo non est ausa recusare serium , perque intervalla repetitum examen , quo , præter illos , qui sacris illi erant à confessionibus , intimas ejus animæ latebras pervestigarunt alii sapientia , & religione singulares , tum è sacra Sancti Dominici familia , tum è Societate Jesu , tum Doctor Joannes de Castillo sanctitate nobilis Vir sæcularis . Illi veritatem omnibus vestigiis indagantes , post diuturnam , & sæpius iteratam quæstionem , hæc præcipuè compererunt . A prima pueritia Rosam cælestes stimulos , & tranquillum orandi spiritum concepisse ; adeo ut nihil illi dulcius esset , quàm loqui cum Deo , ac Divinis inhiare . Ad duodecimum usque annum ætatis vario illam inter orandum tenore , subinde cum imbecillitate corpusculi , cum

somno , & mentis evagationibus
luctatam fuisse : plerunque tamen
animo libero , & quieto perrexif-
se in Deum , & ab illo tempore
expertam ita se divinæ pulchri-
tudini affigi , non modò ut ad nul-
lius rei amorem , velut ad scopu-
lum , adhæserit unquam , sed ne-
que si sponte conaretur , aliò men-
tem detorquere posset , neque in-
timarum imaginum intercurfu ,
nec occupationibus sensuum ex-
ternorum divelli à complexu dul-
cissimi Numinis : radiare in ani-
mæ suæ penetralibus præsentiam
propitiæ Divinitatis , & hac de-
prehensa , nulla se posse alia re ob-
lectari. Interrogata , num quos de
mystica Theologia legisset libros ,
negavit inops Virgo , immo ne no-
men quidem , si quod proprium
esset hujus , quam dicunt , intuiti-
væ orationis , sibi innotuisse .
Quæsitum ab illa est , quanto su-
dore

dore pugnaverit in pravas animi inclinationes; at illa, vix se meminisse talium certaminum, respondit, & ab infantia propensione quadam innata complexam esse virtutem. Si quis autem improvisus motus, nixus fuisset assurgere, repente ex apprehensione divinæ præsentiae citra confictum evanuisse. Numquid solatii caperet ex rebus creatis, quando, animum contemplandi labore fessum nonnihil remitteret, interrogata, negavit, se posse rebus perituris exhilarari: ac si ad momentum conspectum perderet amantis Dei, id sibi videri atrocius quavis gehenna. Horrendas porrò imagines, pavoresque, quibus illam diximus agitatam, statuerunt quæsitores, fuisse experimenta poenarum, quibus in diro carcere ignis purgantis torquentur animæ. Quando verò

nulla spes evadendi illi affulgebat, quodam æternitatis fumo, & horroris inferni caligine obte-
nebratam fuisse; ne Virguncula
tam prodigiosis ditata muneribus
aliquando superbiret: utque illius
amor hoc igne purgatus vehe-
mentiùs inclaresceret. At adacta
pro imperio aperire, qualiter sibi
post illas infernas tenebras esset,
suffusa rubore, quem metus, ac
pudor accenderat, dixit demissa,
& intercisa voce: Plerumque post
illas tenebras ostendi sibi humani-
tatem Christi, nunc virili, nunc
infantili facie: sæpius & Virgi-
nem Matrem, & hanc diutius ob-
tutui suo indulgeri: hinc robu-
stum gaudium super omne gau-
dium, hinc experimentum co-
gnationis divinæ, hinc vitam, &
alacritatem omnium affectuum ori-
ri: hinc accensum pietatis ignem
nullis fluxarum blandimentis re-
rum:

rum extingui posse . Denique post omnia sagacissimè explorata , hæc omnium quæstitorum sententia fuit : Tutissimam esse viam , qua Virgo ambulabat : nullam hîc subesse vaferrimi Dæmonis imposturam . Aliqui Theologi præstantissimi , auditis , quæ de Augustissimo Trinitatis Mysterio , de hypostatica Verbi Divini Unione , de libro Vitæ , ac Prædestinationis , de natura Gratiæ , aliisque Fidei secretis , arcana promebat Rosa , neque par acumen illius foeminæ ingenio , neque ullam mentem liberalius à Patre luminum illustratam se cognovisse professi sunt , & manifestè patuisse altiorem spiritum , qui in Virgine loquebatur . Præcipuè vero cepit omnes admiratio , quod ab infantia ad gradum , quem dicunt , Unitivum ascendisset , absque eo , quod alium , quem nuncupant Purgativum , vix attigisset :

D 6 quod-

quodque in horrendo illo tenebrarum tormento, & miseris fluctuantis animi tempestatibus, quasi certaverit cum Deo, tristiusne ille affligeret, an illa vellet affligi; adeoque non solum ferendo fuerit, sed & quotidie triumphaverit. Sanè apud omnes quotquot Limæ tunc aderant, & aderant multi consummatæ virtutis famâ celebres, invaluerat constantissima opinio, Rosam spiritu Dei agere, & agi, & sapientiâ cælitus infusâ gubernari. Quædam sanctitatis nomine celebris foemina sicubi cum ea concurrisset, flexis humi genibus repugnantem excipiebat, & eodem corporis habitu ad eam literas dabat; at ubi Rosa vestigium fixerat, gestiebat, os, & oculos applicare.

CAPUT XI.

Rosa cum Christo, Deipara, & Sancta Catharina Senensi familiariter, iucundè, assiduèq; sermocinatur: domestica Tutelaribus Angeli consuetudinè fruitur: variegatè luctatur cum Dæmone, semper victrix.

Non solum post internas animi nubes Divini Solis manifestus vultus Rosam exhilarabat, sed aliàs quam sæpissimè videndum se præbebat amantissimæ Virgini. Dum sacros Rosa libros percurreret, parvus Amor vix digiti staturâ procerior obambula-
bat paginas passu levissimo: & interim sereno, suavique obtutu Sponsæ suæ blandiebatur: dam-
telas consueret, laborantis pulvilo quietissimè insidebat: arridebat,

ri-

ridenti, breves protendebat ul-
nas, velut offerens amplexum,
omnique gestu, ac motu testa-
batur amorem suum. Has verò
delicias frequentes Rosæ obtigif-
se, immo ferè quotidie, argumen-
to est, quod si ille tardabat, Spon-
sa querulis vocibus lamentabatur:
utque amor Poesim docet, suas
querelas familiari metro illiga-
bat. Ex gutturis dolore aliquan-
do laborantem Sponsus invitavit
ad ludum, & victrix Rosa suos
mitigari dolores poposcit, & im-
petravit. Divinus verò collusor
jacturam non ferens ludum instau-
ravit, & cum illi prosperè alca-
cessisset, in victoriæ præmium
quæsit, augeri tolerantiam
Rosæ; ideoque primos illius
dolores geminavit. Hoc dum
blandè, modestèque narrat ma-
tri, ne illa ob suam ægrimoniam
contabescat, visa est aliquandiu
vultu.

vultu Angelico radiare . Aliàs : cum in hortensi cella nocte concubia : viribus destituta fomento indigeret , sui lateris ambrosianæ delibandam cordi Virginis Christus obtulit , uti quondam Catharinæ Senensi , cujus proinde Virginis non alumna solum fuit , sed etiam collactanea . In illustri fœminæ domo post sancta colloquia de more secessit ad orandum , & septennis puella juxta Rosam vidit puerum Jesum : multicolori amictu indutum , & radiis coruscantem . At in aliis ædibus Isabellæ Mexiæ visus est divinus Infans : confertis cum illa manibus porticum obambulans miscere secreta colloquia : hæere in Sponsæ vultu , tanquam rerum omnium oblitus : & quacunque fixisset pedem , improvise lumine fulgebat pavimento . Quid quod mutui amoris adeo sollicitus erat Sponsus

sus Divinus, ut ne florem quidem in consortium venire pateretur. Invenit aliquando Rosa, eradicatos flores, quos in horto studiosius alebat, & ob id dolenti Christus occurrit, ac dixit: An non ego flos campi, melior quovis cælesti viridario? Flos es, ac flores amas? Mihi tuos amores indulge. Ego illos eradicavi, ac projeci. An non hæc fidem faciunt, visioni foeminæ cujusdam religiosissimæ, cui professus est Christus, à se Rosam gestari in penetralibus cordis, seque vicissim in ejus virgineo pectore tranquillissimè habitare. At Cæli Regina quàm frequenti alloquio, aspectuque Rosam dignaretur, vel ex hoc deprehendi potest, ut paucis multa complectar, quod cubiculariæ officium illi exhiberet, mane Virginitatem à somno excitando. Illam à multo tempore destituerat, necessa-

sa-

farius somnus ; cui conciliando moderatores animæ præcepere vespertinum lactucæ , ac soporiferorum seminum usum ; sed cum vix hæc inducerent quietem , dum instabat hora surgendi , cruciabatur Rosa , quod ad præscriptam horam evigilare non posset . Ergo Deiparam Stellam matutinam vocavit in vota , quæ cum immineret hora surgendi , aderat conspicua , & miris distincta luminibus , voce nectarea dormientem compellabat his vocibus : Surge ad orationem , filia , surge , nam instat hora . Cum aliquando Rosa in lectulo confedisset , sed prægravante somni pondere in cervical esset relapsa , rediit Augustissima Excitatrix , niveaque manu pulsavit dormientis latus : Surge , dicens , filiola , ne pigriteris . At illa vice Rosa abeuntem vidit à tergo Deiparam suspensis vestigiis , cujus aliàs

ma-

materno vultu solita erat impleri ,
illam cominus intuita , uti facta
est, deque facie ad faciem. Ex quo
semel à Christo data illi fuit Ma-
gistra Catharina Senensis , mutua
harum Virginum colloquia tam
amica , ac crebra fuerunt , ut , ve-
luti in Moyfi vultum post divi-
num consortium , sic ex vultu Ca-
tharinæ in Rosæ faciem lumina
transiverint, quæ hanc illi per oris
lineamenta propemodum assimi-
larint . Hinc apud omnes Rosa
altera Catharina Senensis diceba-
tur , præcipuè ab obitu , cum illius
facies in feretro videnda omnibus
patuit . Cum Tutelari Angelo do-
mestica illi necessitudo intercessit:
illum legabat ad Sponsum , si for-
tè hic hora consueta non adfui-
set . Nocte quadam in eremo sua
sensit vires ex improvise langue-
re ; ideo rediit ad matrem , quæ
instantis deliquii signa notans in
filix

filix vultu, jussit ancillæ, adire subito vicinum propolam, & emere libum Indicum, quod Chocolatam vocant. At Rosa rogavit matrem, ut sumptui parceret, affirmans, sibi potionem illam non defuturam. Subirata mater ancillam urgebat ad opus. Sed Virgo, mox, inquit, aderit è Quæstoris domo, qui calentem deferret Indorum ambrosiam. Et quis hoc noctis Quæstorem admonuit de imminente deliquio tuo? addebat mater. Cum ecce Quæstoris servus vas affert argenteum, calenti chocolata plenum. Attonita parens obedientiæ vinculo filiam adegit, ediceret, unde compererit, affore sibi remedium. At illa subridens, sæpe me, inquit, hujusmodi dignatur officiis Angelus Tutelaris: illum misi, qui admoneret Quæstoris uxorem de medela, qua indigebam. Solebat
ma-

mater ante mediam noctis horam
aperire ostium horti , ut inde filia
se domum reciperet . At quon-
dam oblita cum esset, Rosa per
fenestram cellulae suae vidit um-
bram candidam motu decoro agi-
lem , aspectuque non injucundam,
quæ Virginem , ut se domum ver-
sus sequeretur, invitabat . Agno-
vit illa sub umbra latentem An-
gelum suae custodiae destinatum ,
cumque illo se dedit in viam . Ut
ad horti januam pervenere , hæc
ad umbræ tactum sponte patuit .
Sed & aliorum Tutelares Angelos
sibi ad nutum habuit obsequen-
tes . Exemplo sit vir quidam è re-
ligiosa familia , qui peregrè pro-
fecturus Rosæ preces flagitavit pro
itineris periculis divertendis . At
cum diu iter tutissimum habuisset,
in Truxilli convallibus gravia
quæque perpeffus est : ac deinde
Limam regressus, cum Rosa con-
que-

queri cæpit, quod se destituiſſet. Virgo id accidiffe dixit, quia non ille tunc fuerat peregrinus, qui eſſe ſolebat, & hominem admo- nuit de arcanis ei ſolummodo no- tis, quæ non niſi Angelo inter- nuncio Roſæ potuerant innotuiſſe. At quantum illam Sanctiſſimi An- geli amabant, tantundem ode- rant furix tartareæ, quæ aliquan- do palam cum generoſa puella certarunt. Ingentis moloſſi for- mæ ſemel in horti cella per tene- bras aggreſſus eſt Roſam malignus Tenebrio: pertentavit irritò mor- ſu virgineum corpusculum, quam- que diſcerpere non poterat, diu raptavit per ſolum, quouſque Ro- ſa his vocibus: Ne tradas beſtiis animas conſistentes tibi: hoſten- egit in fugam. Fuit, cum ex in- ſidiis adrepens Cacodæmon im- proviſum ei colaphum incuſſit: cum ſaxum in eam libravit eo
con-

connisu , ut euntem affligerit : cum in secreta ædium parte orans Rosa vidit in prægrandi sporta teterrimam belluam licentius tumultuari , ac , dedignata qualicumq; solatio lucis uti , candelam extinxit , & hostem in arenam provocavit . At ille gigantea mole profiliens per humeros corripuit Virginem , strinxit , contorsit , quasi laceraturus obluentem : & omnia quidem puellæ ossa commolita videbantur , nervique distracti ; at infractus animus risit furentem Cyclopis insaniam . Animadversum est , frequentes hos Virgini fuisse agones , nec unquam formidinis ab illa sensum expressisse , quando feroci vultu animorum prædo irruebat . Sed aliquando cum in horto specie formosissima , ac penè mutatus in Angelum lucis illi adstitisset , & procum ageret , à nobili fuga victo-

Victoriam quæsiuit illico Rosa , & in propinqua porticu ferreâ catenâ correptâ nudos sibi humeros flagris acerbissimis cruentavit, interque sanguinis , & lachrymarum rivos de Sponso conqueri cæpit , quòd se tunc destituisset . At ille manifesta luce conspicuus Rosæ vultum exhilaravit , ac dixit : Ni tecum ego fuisset , tu ne victoriam reportasses ? Germana planè sunt hæc iis , quæ Sanctæ Catharinæ Senensi in certamine simili contigerunt ; cui Virgini collata munera Sponsus in Rosam quoque congestit : velut etiam mirabile donum internoscendi synceras visiones ab illusionibus Sathanæ , quo floruit à pueritia : ac tunc crudité recensuit regulas distinguendorum Spirituum ab effectibus , quos in anima pariunt . Has olim Christus Catharinam docuit , hæc Rosam , quæ suam
adeo

adeo Magistram expressit, ut si ad Indos accidisset fama erroris Pythagoræi de transmigratione spirituum, quamplurimi credidissent, Catharinæ animum in Rosæ corpus ingressum.

C A P U T XII.

Rosæ vexationibus, morbis, ærumnis pressæ prodigiosa tolerantia.

Rosis conascuntur spinæ. Nonnum ætatis mensem attigerat, cum lactanti matri aruerunt ubera, reque angusta domi prohibente conductam nutricem, liquidiori pulte supplebatur lactis inopia, diducto parvulæ ore non sine cruciatu, sed sine lachrymis; quinimmo Rosa sui pollicis inutili suctu tacita fraudabat famem. Vix pedibus ingredi cæpit, cum ob muliebrem Avix, Matrisque de
Illa.

Isabellæ, Rosæque nomine controversiam, utriusque vexationibus se vidit implicitam, excepta virgis ab avia, si ad Rosæ nomen, à matre, si ad Isabellæ, respondisset. Ut suavis erat indoles filiolæ, sic asperum ingenium matris, quæ Rosam ob eximiam modestiam, perpetuas preces, ac sæculi fugam, non convitiis solùm, alapis, pugnis, & calcibus, sed & nodoso baculo ex malo cydonio delumbabat; præsertim post grande crimen præcisi capillitii. Nec mitiores in eam domestici ob continuum commercium divinorum, & ferè nullum alimentum, quo patebat, humanis viribus eam vivere non posse, vocabant Rosam in suspicionem fictæ sanctitatis, eique minabantur, brevi rapiendam ad sacrorum Quæditorum tribunal. Exultabat interim Rosa videns, per ipsas Catharinæ vias ire se ad.

E Sponsi

Sponsi complexum: & ab illustri
fœmina interrogata, cur à Seraphi-
ca Magistra sua non quæreret ab
his ærumnis effugium; nanq; apud
omnes in comperto erat, Rosam,
quæcumque vellet, à Catharina
impetraturam: pluris se facere, di-
xit, suæ matris stigmata, quàm
delicata solatia; eò quòd puderet
Crucifixi sponsam vel per mo-
mentum cruce viduari. Et hæc
quidem prægrandis nunquam,
aut rarò illi deerat; namque va-
cantem ab externa gravior occu-
pabat interna, cessantique foris
insectationi agminatim corporis
ægrotationes succedebant. Ex di-
ra nervorum attractione triennium
lecto decubuit cruciatu immenso,
gemitu nullo. Mirum quot ex
diversis, oppositisque causis in
Virginem morbi irruerent, terni,
simul, & quaterni, nullo suppo-
sito in exucco, aridoque corpuf-
cu-

culo ardoris pabulo . At non ab intemperie humorum , sed à benevola Sponsi manu, ut ipsa probè sentiebat , hisce agonalibus bonis provenientibus . Sanè confessa est aliquando , putare se , nullum alicujus partis , aut membri superesse cruciatum , quem ipsa experta non fuerit . At ne primus quidem impatientiæ motus unquam obrepfit , qui affixam divino beneplacito vel latum unguem detorqueret . Cum angina , cum asthmate , cum ischiade , cum pleuritide certandum illi sæpissimè fuit . Stomachi , pericardij , intestinorum dolores frequentes convulsiones invehebant : febres , easque contumaces assuetudo verterat in jocum ; non item articulares manuum , pedumque fidiculas , podagram , chiragram , arthritidem , domesticam præcipuè familiam epulorum , quæ impransam , &

incænata[m] Rosam frequentissimè
infederunt . Illa inter extremos
dolorum laniatus , bene sibi esse
perpetuò dicebat , & Sponsum
tantummodo alloquebatur his vo-
cibus : Domine , auge , auge do-
lorem , dummodo augeas & amo-
rem . Quàm verò suæ Rosæ pre-
cibus obsequeretur Sponsus Divi-
nus , ostendit mirabili , celeberrima-
que visione , qua supra geminos
arcus lucis immensæ Christum li-
brantem aurea lance hominum to-
lerantiam , suaque munera illis col-
lata in præmium , aspexit : eum-
demque suum regem audivit ela-
ta voce commendantem poenas
constanter ab hominibus devora-
tas : & affirmantem , non alia , quàm
Crucis , scala ad Cælum eniti ho-
mines posse . Tunc validissimus
impetus Rosam invasit profiliendi
in forum , & ærumnarum pretium
celebrandi , divinæque gratiæ , cu-
jus

jus mirabilem pulchritudinem, & vim, qua constituit animas deiformes, aperte viderat. Hoc præparavit Rosam ad ultimos paralyfis dolores, qui præmaturam ei mortem intulerunt.

CAPUT XIII.

Rosæ ardentissimus erga Sponsum amor, variis indiciis manifestus: Impetratum ab illa miraculum sudantis imaginis, ut Christum omnibus amandum persuadeat.

QUanta in hujus Virginis corde flagraret Æterna divini amoris, palam aliquando fecerunt splendores, & flammæ ab orantis vultu scintillantes. Visa non rarò est evibrare per os, oculosque lucidissimum ignem, præcipuè dum funderet preces. Ejusdem ardoris indices erant ignita

fuspiria , quibus perpetuò divinum cordis æstum ventilabat . Ardentes perpetuò precatiunculas jaculabatur in cælum , quas operæ pretium esset hîc apponere ; nanq; plurimis usui fuere non sine maximo divini amoris incremento . Omnia Rosæ colloquia , salutationes , responsa amoris divini mentione condiebantur . Unicum illi solatium erat, de amore divino aut audire , aut loqui : omne aliud argumentum comi dexteritate huc inflectere . Tunc Virgini aliàs taciturnæ præstò erat facundia mirabilis : fulgurabant oculi , & ex cordis abundantia loqui linguam manifestum erat . At cum in privato Orationario solvebatur in preces , gratissimum erat audire invitantem singulos ordines creatarum rerum ad amorem divini Conditoris . Duabus , ac tribus horis eidem insistebat , & clam audiebatur à multis ,
qui

qui viderunt arripientem non rarò
pendulam è pariete citharam, ta-
ctuque chordarum temperantem
impetum vocis, & excepta sunt
hæc verba ab illa numeris illi-
gata:

*En inter Flores pulcbrescis, & in-
ter Oliuas;*

*Iesule, nec molli spernis adesse
Rosa.*

namque matre Oliva, & patre de
Floribus nata erat. Vehementissi-
mi amoris comes, ac testis zelus
Virginem adurebat; ideoque otio-
sos in templo fabulantes admone-
bat officii. Non erant domi, qui
coram illa quid ineptum profer-
rent, veriti fulmina Virginis di-
vinas injurias non tolerantis. A
prima pueritia si fortè audivisset
sorores amatorium quid conci-
nentes, uberrimo fletu testabatur.

dolorem cordis exulcerati. Lachrimas, quia unicè ad ærarium Dei pertinere didicerat, nanque illis emitur cælum, nolebat aliò à quoquam profundi; ideoque cum fortè vidisset matrem plorantem: Quid, inquit, prodigis gazam Numinis thesauro inferendam? Quotiescunq; verò suum Deum ab aliis coli animadverteret, triumphabat immenso gaudio: & aliquando cum rediisset ad cor foemina è sacro Cœnobio profuga, Rosæ miris lætitiis incessit, festumque diem egit, perinde ac si totius Americæ sceptrum ad illam devolutum fuisset: Deusque, ut Rosæ gaudium intenderet, ostendit ei sanctitatem insignem, quam adeptura olim erat pœnitens Sanctimonialis. Habiturus aliquando erat solennem concionem Confessarius Rosæ, quem repentè febris invasit. Rescivit id Virgo, & precibus contra

tra

tra se invitavit Concionatoris febrim, futurique eventus certa virum admonuit, præstò illi fore vires, se verò coquendam feбри non sua: quod re ipsa contigit Rosæ, ut olim Sanctæ Catharinæ Senensi. Propagandæ gloriæ divinæ studio innumera excogitabat in dies, quæ hominum pietatem accenderent: velut inter cætera novam artem, conficiendi vestes Infanti Deo, offerens pro indusio, fascia, stragulo, fimbriis, crepundiis, precatio- nes, jejunia, verbera innumera: quod nobile inventum quamplurimi amplexi sunt. Hanc autem sui amoris amplificandi sollicitudinem ingenti miraculo probavit Deus. Anno hujus seculi septimodecimo, quintadecima Aprilis die, cadente Sole Rosa cum uxore, & filiabus Gundisalvi Quæstoris effusa in preces ante pulcherrimam Servatoris imaginem vehementius amoris

stimulis concuti cœpit, iamque nec voci temperare posse, sed erecta in pedes fervidissimè affari suum Deum, eumque obtestari, ut ignitâ pharetrâ excussâ mortales omnes sui amoris telis vitalibus vulneraret: cum ecce puella Quæstoris filia videt Servatoris vultum sudore madidum, in argumentum amoris, quo flagrabat amantissimus Deus, quemque in Rosæ gratiam indicîis illis profitebatur, ut pares in hominum cordibus flammâ accenderet. Mox puellæ mater, tum genitor, deinde Religiosi viri, tandem Angelinus Medorus, qui sacram effigiem coloraverat, alique plurimi viderunt copiosas sudoris guttulas ad instar minutissimorum unionum, tota sacratissimæ imaginis facie conspicuas lucere, ac prominere: subnasci aliis alias, mutuoque attritu solvi in fluxum, ac diversis

lineis

lineis per capillos, & collum decurrere, quòque detergebantur magis, eò magis erumpere, rivosque rivis succedere: & hoc ostentum supra quatuor horas produci, nullo colorum, aut venustatis detrimento, immo adaucta interim pulchritudine vultus divini. ChrySTALLINI humoris claritas, odor nullus, & alia quamplurima examina palam fecere, non inesse humori pinguedinem aliquam ex coloribus oleo temperatis, sed omnes naturæ, atque artis industrias à tali prodigio longè abesse. Proscenium illud amoris divini reciprocos hominum amores invitantis Rosæ vota implevit; nanque omnes, qui spectaculo interfuere, novis, acutis, insolitis divini amoris stimulis sub illius intuitu vulnerati sunt. Neque hìc stetit miraculum, sed alterius partu suam certitudinem asseruit; namque Rosa

ipsa lapsu fortuito ad terram al-
lisa graviter offenderat; adeo ut
chirurgi metuerent, aut mancam
Virginem ea parte fore, aut cura-
tionis remedium diuturnum, in-
certumque. Rosa certa recupe-
randæ salutis, si gossipium divino
sudore madidum brachio admove-
retur, tamen cupida fruendi diu-
tius doloribus suis, id non est au-
sa, nisi ex Confessarii præscripto.
Tunc verò impulsu prævalido sen-
tit redire ad suam sedem distortos
nervos, detumescere pulpas, di-
stringi musculos: attonitis ad hæc
chirurgis, qui de intractabili bra-
chio, & in omnem medelam contu-
maci, iam prope desperaverant.
Præter illa, quæ innuimus, Rosæ
prodigia, imperium in belluas, ar-
boresque, & in spiritus ipsos ex
corporis concretionem sejunctos, in-
tuitum cordium, & absentium re-
rum, manifesta alloquia præsentis
Dei,

Dei, prodibit brevi aliorum uber-
rima appendix.

CAPUT XIV.

*Rosa cum imagine Deiparæ familia-
re consortium: in divina Crucis
signum religio: Mutui honores,
quibus illa, & S. Catharina Se-
nensis se prosequuntur.*

ANtecentum, & amplius an-
nos imago Deiparæ Virgi-
nis, cui à Rosario nomen est, Li-
mæ cultum accepit. Ex illo Ro-
seto ver nascentis fidei in eas ter-
ras se latè diffudit. Ad huius
aram Rosa perpetuò procumbebat
in preces, mirâ lætitiâ gestiens, &
suam Divam loquentem variis
serenæ frontis radiis, veluti qui-
busdam nutibus, tam perspicuè
percipiebat, ut nulla verborum
facundia melius præstare id posset.

In

In Filioli quoque divini vultu velut animato libro responsa distinctè legebat, tanquam mutis characteribus exarata. Hunc deperibat: hujus ad intuitum novo calore perfundebatur, & gaudio; videbatur enim cælestis Infans brachia foras protendere, veluti in amplexum Rosæ procurusurus. Fama erat, illam omnia impetrare, quæcumque ante sacram imaginem à Cæli Regina flagitaret: ac tanta securitate rerum eventus pollicebatur, ut concessæ gratiæ diploma præcepisse videretur. Colebatur in domestico Oratorio altera Dei Parentis imago, in qua Rosa videbat omnia spirare, ac vivere, & aliquando cum pia matrona ante illam narraret prodigia, quibus Virgo in Atocha clientes suos à vitæ discriminibus eripuerat, Rosa prospexit imaginem edentem signa inusitatæ lætitiae,

titiaë , torquentem oculos benignissimo nutu , augustius radiantem . Porro sacellum Rosarii quovis die Sabbathi floribus exornare consuevit , quos in horto educabat , nunquam hoc solatio destituta fuit , quanvis perfrigida rigeret , aut ardens esset anni tempestas . Sed pulchrius induebat spiritali veste Regiam suam , tunicam , syrma , coronam , & alia ornamenta , jejuniis , inflictis sibi verberibus , & precibus innumeris componens . Præaltam crucem in hortensi sua cella extantem piis complexibus perpetuò stringebat : ubicunque divinum hoc signum incurrisset in illius oculos , pulsu validissimo ejus præcordia agitabat , sive in fortuita trabium commissura , sive in decussatis sepium bacillis , in vestibus , in ipsis demum festucis , ac paleis occurrisset , illud sine attenta veneratione

tionē nunquam præteribat. Libanotim, vulgò rorem marinum, alebat in horto, cujus tres arbusculæ in crucis formam coibant: unam ex his Proregina dono quæsit, sed apud illam cespes illico exaruit, & idcirco Rosæ manibus iterum insitus, post quatuor dies pulchrior solito reviruit. Circumferre Sanctæ Catharinæ Senensis imaginem quotannis solebat pium Sodalitium illius cultui consecratum: cujus Divæ statuæ coronis, floribus, & multo fulgore gemmarum adornandæ Rosa quoad vixit destinata fuit: quo in munere temperare sibi à lachrymis, ab osculis, ab alloquiis præ ardore, non poterat. Oh si præstò mihi esset pecuniæ vis non exigua, dixit aliquando, ut pulchriori amictu te inducerem, optima Mater! Et ecce illico adfuit, quæ ab illustri fœmina nummos attulit, Rosæ votis
desi-

designatos . Visus non rarò fuit sacræ imaginis vultus insolito splendore radiare . Floruerunt ad imperium Rosæ cariophylli, quorum pridie ne nodi quidem apparuerant in florem erupturi : ac tres vernarunt , quot sibi Rosa jusserat afferri . Francisca de Montoya , quæ sacrum Catharinæ simulachrum exornaverat , Rosæ beneficio incolumis evasit ab igne sulphurato , qui in oculum ipsius incurrerat, & resiliens incendit vestes alterius foeminæ , quam corripuit . Ipsiusmet Rosæ dexteram aliquando horrenda arthritidis invaserat , adeo ut intumescente manu mirum in modum nec digiti loco moveri possent . Ut verò Seraphicæ Matri suæ festivum habitum solito cultu componeret , digitos forficum an-
fulis inamisit , cum id fieri præ tumore non posset, & alacritate miragemmas, torques, monilia in ordinem

nem distribuit, attonitis ad hæc Regio Quæstore, illius conjuge, & medicis, qui divinitus id contigisse professi sunt.

C A P U T X U.

*Rosæ fervidus amor, & cultus
in divinam Eucharistiam,
pro qua ad Martyrium
se accingit.*

TEr ut minimum in hebdomada divinâ Eucharistiâ reficiebatur, quinquies non rarò, & aliquando in singulos dies. Præmittebat semper magno gemitu, & lachrymarum apparatu sacramentalem confessionem. Pridie asperius cruentabat corpusculum flagellis, rigidoque jejunio, & hospiti divino tam pretiosis ignitarum aspirationum odoribus cordis habitaculum adornabat, ut si per

to-



totum vitæ spatium illa tantum vice exceptura esset amantem Deū. At dum procumbebat ad Angelorum mensam tanto divini amoris igne flagrabat, ut facie præferret cordis incendium; hæc enim coruscabat adeo, ut Sacerdotibus terrorem incuteret, cælesti splendore sæpissimè perfusa. Angelicâ non rarò formâ, radios etiam emittens apparuit religiosis viris: & ipsa Virgo à confessoribus iussu indicare mirabiles effectus, quos in animo suo divinum hoc Sacramentum pariebat, in singulis verbis hæsitabat, causata vocabulorum inopiam; tamen, immigrare se quodammodo, dicebat, in suum Deum, & gaudio tam immenso recreari, ut profectò nulla jucunditas mortalis vitæ comparari posset illi, qua mamilla Regum, pretiosum hoc Convivium, suam secum quodammodo divinita-

ta-



tatem partiebatur. Accedebat robur, & saturitas prodigiosa, adeo ut cum sæpe, dum templum adiret ex pridianis jejuniis, flagris, ac vigiliis fessa, in angiportis hærere cogeretur, divino refecta pabulo domum rediret alacri passu: præiret matrem, veluti si ambulandum illi esset ad montem Oreb in fortitudine cibi illius. Ut verò corporis saturitatem à pastu Eucharistico acceperit, patuit domesticis; namque reversa domum ab epulo divino, rectà festinabat ad secretum cubiculi, & ibi ad seram usque noctem inclusa perstabat in Sponsi complexibus: & rogata cibum sumere pridiano exhausta jejunio, respondebat: præ ingenti satietate à mensa Domini alium se cibum admittere neutiquam posse: & aliquando per octo solidos dies Altaris Sacramento pasta ab omni prorsus corporali alimonia, veluti

San-

Sancta Catharina Senensis, absti-
nuit. Tanta verò religione venera-
batur hoc Sacramentum, tam ar-
denter amabat, ut, quotiescumque
illo recreanda erat, Missæ sacrifi-
ciis interesset omnibus à summo
mane ad meridiem usque, ne ad
momentum quidem oculos ab ara
deflectens, aut supercilia unico ni-
ctu demittens, licet noti, ignotiq;
ante illam transirent, & ferè in
oculos incurrerent. Cum publica
quadráginta horarum supplicatio-
ne adorabatur Sacramentum à po-
pulo, à mane ad vesperam usque
immota prorsus hærebat innixa ge-
nibus Rosa, oblita prandii, ne vnâ
quidem aquæ guttâ refecta: sic per
octo solennes dies SS. Christi Cor-
pori consecratos: sic ultimis qua-
tuor annis, ubi feriâ quintâ mayo-
ris hebdomadæ deduxerat ad mo-
numentum Regem suum, donec
die Parasceves ad tabernaculum
trans-

transferretur, nec noctu inde cedebat, affixa tumulo, toto viginti quatuor horarum decursu, nec sedere coram illo ausa, nec muro tantisper acclinari. Sicubi audisset ad divinum Corpus adorandum signa dari, cor, & caro illius exultabant in Deum vivum, & vividior in facie color accendebatur. Jucundissimum illi erat suis manibus aptare lintea, pallas, & quidquid textile ad sacram Altaris suppellectilem spectat: pretiosos è filis sericis flores effingere, & in hæc opera conficienda, ne diurni laboris penso egestatem matris fraudaret, noctis partem seponere. Denique pro SS. Eucharistiæ mysterio vitam effundere prægestiit. Cum Batavorum classis Peruvix littora popularetur, & ipsi jam Limensi portui immineret, immo etiam in arenam profiliisse milites dicerentur, Rosa, cæteris exanimatis, mirum in-

mo-

modum exultans, in templo socias hortari cepit ad subeundum pro religione martyrium : utque majorem iis ardorem iniiceret, facie rutilante, vestem, qua longior in terram defluebat, alacriter præcidit, cothurnos exuit, ut in brevi hac veste magis expedita incurreret in hostes. Ex oculorum scintillis, ex impavidi vultus constantia, ex vivido sono vocis heroicæ animosa virago lænam induisse videbatur, læcessens horam fatalem, & morti minitans pugnacissimè. Fervebat Virgini sanguis effundi avidus, cum auditum est, receptui Batavos cecinisse : & voto suo fraudata Rosa torqueri cepit ardentiori siti martyrii, cujus amore saucia dolebat se non illis temporibus natam, quibus gliscebatur tyrannorum furor in Christianos, & sæpe cum gemitu dicebat familiari matronæ :

næ: Utinam idonea ratio, & modus occurreret, adornandi fugam, ad barbarorum provincias, & ibi sanguinem pro Christo fundendi.

C A P U T XVI.

*Rosæ eximium pro periclitantium
animarum salute studium,
& ardor consulendi cor-
porali saluti proximo-
rum supra modu-
lum facul-
tatum.*

QUoties ad interiora meridionalis Americæ montana flectebat oculos, cruciabatur medullitus, illachrymans infelicitati tot barbarorum: & cæteræ gentes Christianis legibus non excultæ perpetua illi erant materia lachrymarum. Optabat visceratim discerpi, ac retis instar obpandi voragini, qua tot animæ infelices
rue-

ruebant ad Tartara : hortabatur Religiosos viros ardentissimis verbis , ut vulneribus animi omni ratione mederentur , & ad nuncian- dum Barbaris Evangelium festina- rent : non hærendum , intonabat , in subtilitatum apicibus , in con- troversis verborum : proiici scho- lasticos labores , clamor atque dis- putationes , si tantis parta sudori- bus eruditio proximorum saluti , fideique propagationi non impen- datur . Asseverabat , se nisi foemi- nam natura finxisset , decurso stu- dio literarum adituram fuisse fero- cissimas gentes , quas vel in viam salutis reduceret , vel ab illis co- ronam acciperet mortis obitæ pro fide sanctissima . Statuerat adopta- re sibi pupillum inopem , & deso- latum , quem in studio virtutis , & literarum educaret ad laborem in conversione gentilium subeun- dum . Uni ex Confessariis suis in-

certo, an expeditionem ad Barbaros susciperet, obtulit dimidium operum suorum, quibus Divinitatis amorem demerebatur, ut alacrior ille ad excolendam vineam Domini festinaret. Quæ verò illi cura fuit, & zelus periclitantium Christianorum. Pro his quotidie cruenta sibi verbera infligebat, dicens: si quomodo sibi licuisset fungi sacri Oratoris officio, operam horrido cilicio, nudipedem, squalidam interdium, noctuque se circunlaturam Crucifixi Servatoris imaginem per fora, per trivia: & lugubri clamore revocaturam ad cor homines à recta via decurrantes. At divini verbi concionatores fervidâ modestiâ admonēbant officij, ut facundiâ inani; & inutilibus floribus, ac theatricæ ostentationis cothurno posthabito, animadverterent, constitutos sese hominum piscatores, qui flagitiosas
ani-

animas eximerent ab ima charybdi vitiorum. Et exemit ipsa Rosa nonnullas prodigiosè. Juvenem præcipuè genere, quàm moribus nobiliorem, qui amore pulcherri-
mæ Rosæ succensus, ac desperata spe nuptiarum, quærebat saltem occasionem, qua oculos pasceret illius venustate; ideoque Rosæ matrem convenerat, ut juberet, à filia collaria sibi aliqua ex pretioso carbaso elaborari. Advocata Rosa, ut statueret, quot ulnæ melioris telæ, & undenam essent emendæ, divinitus edocta secretum, quod corde premebat Vincentius Montefius Venegas (hoc juveni nomen erat,) illum sanctissimis verbis ad virtutem incendit; adeo ut sobriam, & gravem vivendi rationem instituerit, singulis ad minimum octiduis divino Epŭlo refici consuetus. Fœminam præcipitis iracundiæ ad tractabile pacis inge-

nium instituta de tranquillitate animi suavissima concione revocavit; adeo ut fateretur, recordatione mansuetissimæ Rosæ sopiri, quascunque flammæ naturæ ignis accenderet. Religiosum virum cum morte luctantem, & formidine severi Judicis timentem confirmavit oblato illi de suorum exercitiorum qualicunque censu quidquid moribundo deesset ad supplendam inopiam meritorum: ab obitu conveniri se petens à defuncti anima, si fortè indigeret ulteriori suffragio. Et divinitus Rosæ innotuit, illam quamprimùm regioni lucis ascriptam fuisse. Mirabitur profectò unusquisque, pauperrimæ Rosæ funus publicis mendicorum ejulatibus, ac lachrymis celebratum fuisse, vociferante turba egenorum, suam sibi nutricem, ac matrem fato immaturo præreptam; adeo palmas suas

ex-

extendit ad pauperes , cum his dividendo eleemosynas , quas insperatò receperat . Fuit cum octo dierum alimenta sibi subtraxit , pro egentis cujusdam subsidio : cum triginta sex ulnas candidæ telæ sibi à matre attributas ad sudaria , vela , mantilia , omnemque candidi nitoris supellectilem formandam pro arbitrio suo , secretò donavit duabus Virginibus genere , & virtute nobilibus , at pauperibus : fuit , cum oblongum , & ad terram usque demissum matris pallium inopi cuidam Virgini donum fecit , & matri conquestæ prædixit , pluribus illam à divina munificentia ditandam . Stetit promissis fides ; nanque post paucos dies ignotus homo quadraginta libras argenteas pro pallio coemendo attulit matri . Maria de Sala per famulum misit sericum subtegmen alteri conficiendo sufficiens : & si-

bi oblatas ad hoc ejusdem materiæ totidem ulnas Limanum Prædicatorum Cœnobium Rosæ matri destinavit. Nobilem Virginem egestate, ac morbo pressam, & purulenti canceri peste nulli ferendam, intra paternas ædes recepit, & medicas illi manus admovit sedulitate tanta, ut brevi ad salutem revocaverit. Cujuscunque generis pauperes fœminas morbis affectas in domum patriam inferebat; neque tecti solùm, & strati, sed & medicinæ, ciborumque solatio egen-tes reficiebat. Iis abstergebat purulenta ulcera, mundabat vestes, lavabat pedes, nullo discrimine Hispanas inter, & Indas, Æthiopesve, nigras, & candidas. Nulla ægrotatio tam putrida, nullum ulcus tam tetrum, cui virgineas adhibere manus Rosa defugeret. Hac ambitione obibat mulierum valedudinaria, & præ cæteris horridas

in-

intuita, his eluebat vasa, parabat edulia, lectulum componebat, nil dedignata, si vitiata sanies pannis suis adhæreret; quamvis cæteroque munditiam amaret. Quinimmo aliquando cum extractum è vena cujusdam famulæ sanguinem, post biduum seroso virore, flavis, nigrisque maculis, ac sanie ramosa decolorem stomachus horreret, non leves ab se necessarii hujus fastidii pœnas exegit; secessit enim in angulum, & instar Seraphicæ suæ Magistræ, totum illum virulentum cruorem ausu heroico sensim epotavit. Et Rosæ charitas morte fortior non rarò fuit, namque salutem restituit ægrotis, quibus ministrabat. Inter alios Joannes Almanza nobilis vir decumbens impetrato Rosæ alloquio, in illius vultu majestatem Angelicam notavit: & hausta viva spe incolumitatis, solutus in somnum est, & in-

regrè sanus evigilavit . Plura curationum miracula in aliud tempus differimus : interim addere libet, quod vel ad bruta animantia Rosæ suavitas , ac tenera miseratione protendebatur . Erat Mariæ de Oliva Rosæ genitrici miræ pulchritudinis pullus gallinaceus , cujus in tergo , & alis versicoloribus amoena plumarum varietas ludebat, & collum quædam veluti purpura incinxerat ; adeo ut domi in deliciis esset . Sed cum jugiter cubaret humi, nec unquam vilis esset in pedes attolli, nunquam auditus cucurire , pertæsa mater constituit illum jugulare, & mensæ comedendum apponere . Astans Rosa, canta, inquit, mi pulle, ne moriaris . Vix verbum protulerat , cum sub oculis omnium repentè gallus affurrexit in pedes , totum conclave prætumidis passibus perambulavit, & hilar-

ri-

riter cucurivit , repetita quindecies intra quadrantis horarii spatium cantilena .

CAPUT XVII.

*Rosa magna in Deo fiducia crebro
in suis , suorumq; necessitatibus
prodigiosum Cæli præsi-
dium experitur .*

M Irificè afficiebatur verbis illis Davidicis : Deus in adiutorium meum intende : Domine ad adjuvandum me festina : hæc sedens , stans , ambulans religiosissimè iterabat . Nihil unquam in rebus humanis opis , aut perisurgii collocavit . Tria potissimum erant , de quorum assecutione dubitare Rosam non sinebat cælitus concessa fiduciæ certitudo : primum æterna sua beatitudo : alterum perpetua , & nunquam interpolanda Dei amicitia : postremum ,

certum ex alto auxilium in quibusvis necessitatibus , ac repentinis periculis . Semel concussa est pavida formidine circa prædestinationis arcanum omni animæ tremendum ; sed illico Dominus sic illius cor est alloquutus : filia, neminem condemno, nisi volentem condemnari : igitur exhinc tranquillo animo esto . Exinde tam invicta fiducia cordi Virginis inhaesit, ut interrogata à Doctore Castillo, an suæ salutis certam notitiam divinitus accepisset , fateri compulsa sit , superna illustratione tempestivè se didicisse , quod ab omni æternitate electa erat ad caelestem gloriam ; quin etiam in ultimo decubitu cognovit , ab omni purgantis ignis mora immunem sese futuram . Dum hortensem cellam incolebat , in mentis excessu vidit circa se undique solum conpersum rosas, & miranti, quonam pacto
tam

tam repentino vere regeretur terra, parvulus IESVS apparuit, & Rosam blandè compellans, iussit, sparsas Rosas colligere. Lætas illa Divino Puerò attulit, qui ex omnibus unicam in donum poposcit, &: Hæc tu Rosa es, dixit, cujus providam curam assumo. Intellexit illico sapiens Virgo, quorsum tenderent verba Sponsi, & gavisâ, teneri se in dextera veluti Rosam electam, sollicita, quid agendum de reliquis esset, brevi consilio subitaneum inde sertum confecit, & cælesti Infanti reverenter imposuit, qui mox suavissimè arri-dens discessit. Pari certitudinis solatio fruebatur in securitate gratiæ, divinæque amicitia, cum cælitus comperisset: in Sponsi favore se confirmatam, ut ne ad momentum quidem dulci amicitia fœdere posset excidere. Asseveravit aliquando animæ suæ moderatori, facilius im-

ponendum sibi ; quod palea esset ,
aut faxum ; quàm quod haberet
Numen aversum. Eadem vis confi-
dentiae Rosam adversus quaslibet
mortalis vitæ difficultates armarat.
Nil metuens obvios tauros ferocis-
simos perstitit sæpius in vestigio ,
matre fugam circumspiciente ,
spondens , immanes belluas in-
noxie transituras : quod re ipsa
bis contigit , non sine admiratio-
ne omnium , qui præsens Virginis
exitium metuebant . Ut verò spe-
rabat subsidia ad victum necessa-
ria ! Certior aliquando facta do-
mesticæ penuriæ , quia panes nulli
supererant , arcam aperuit , & ple-
nam reperit panibus ultra domus
illius morem candoris , ac saporis
eximii , testante figura inusitata ,
& peregrina , eos aliunde prodiisse .
Alia vice mel defuit , necessarium
illis regionibus condimentum :
his ter experti , fundo tenus ex-
hau-

haustum arescere vas, filii retulerunt matri; at illa Rosam legavit, quæ cupam invenit usque ad supremum labium recenti melle plenam, quod novo prodigio integris octo mensibus toti familiæ satis fuit in usum quotidianum. Gasparem Flores patrem Virginis premebat ægrotatio corporis, animique mœror ob quinquaginta librarum debitum, cui solvendo non erat. Ut Virgo rescivit, fudit in Templo preces, & domum redeunti vir planè ignotus involutam strophiole pecuniam patri necessariam porrexit. Ejusmodi peregrinis subsidiis pluries egenæ domus in gratiam sanctæ filiæ recreata fuit. Quinimmo erga locupletissimum Sponsum ea fuit Rosæ fiducia, ut ausu liberali Virgo pauperrima frequenter, & palam in se receperit, providere de toto sumptu ad excitandum a-

fun-

fundamentis novum Sanctæ Catharinæ Senensis Monasterium, cuius erectio cælitus promissa, & ostensa illi fuerat, quodque tam seriâ fiduciâ sponpondit, ut mater fastidio, impar Rosam quasi manifestè delirantem objurgaverit: Et ubi sunt, dixerit, bis centies mille libræ argenti? At illa, fidèjussorem, inquit, habeo illum, in quo thesauri omnes. Sed hæc seorsum narrabimus.

C A P U T XVIII.

ROSA divinitus cognoscit, edificandum in Urbe Limanâ Sanctæ Catharinæ Senensis Cœnobium.

*Eidem alia complura ar-
sana Deo revelante
patefiunt.*

Floret nunc Limæ numerosum
ducentis sacris Virginibus
Cœ-

Coenobium sub instituto Sancti Dominici, erectum anno seculi hujus vigesimo secundo ab illustri, & opulenta vidua D. Lucia Guerra de la Daga. Istud integro ante jacta fundamenta decennio nunc per symbola, & figuras, nunc manifestè in propria forma, & typo fuit Rosæ divinitus præmonstratum: de illo securè, ac fidenter loquebatur, perinde ac si constructum ante oculos haberet: designavit foeminas, quæ illic Deo famulaturæ essent, ac inter has propriam matrem: numerum definivit, locum prædixit, futuræ ibidem fabricæ topographiam in tabella delineavit: primum incruenti sacrificij Mystam nominatim expressit: primam futurarum Monialium Præfectam ex vultu agnovit, spiritu suo imbuit, osculo pacis quodammodo initiavit. Nonnullis visa est insanire; cum præcipuè

cipue illustris foemina, quam Cœnobii fundatricem fore vaticinata fuerat Rosa, superstitem virum haberet, & matrem circumstaret soboles numerosa, quatuor nempe filii, & una filiola, & qui in se receperat curam exorandæ à Rege facultatis, Madrito Limam rediisset infecta re, & nulla spei lux in posterum affulgeret. Sed Lucix maritum, & paulò post filios omnes ab hac vita Deus evocavit: obstacula innumera, & potentissima disjecit: repugnantium animos ad favorem pii operis flexit, ac brevi stetit nobilissimus Parthenon, qui etiam nunc sæpissimè Rosæ Monasterium, hoc est diu ante Rosæ vaticinio prænunciatum, amat appellari. Hoc primùm fatidico animo præcepit, cum aliquando lectas in horto Rosas cœpit nō sine religiosis suspiriis in altum jactare, & germano fratri su-

per-

pervenienti, & quærenti, quid
rerum ageret, mysterium occul-
tavit; sed cæpere loqui prodigia;
nam quas Rosa in sublime sparfe-
rat, hærebant in aere, & in con-
spicuum sanctæ Crucis figuram
aptissimè coibant, eidemque Cruci
à succedentibus rosis decorus per
circuitum limbus formabatur.
Agnovit Rosa, Virgines illas esse,
quæ in cælestem prætoris vitæ
legem coaptatæ, è sublimi per-
fectionis statu terram despecturæ
erant. Aliàs oranti fuit ostensum
pulcherrimum pratum, liliis, ro-
sisque variegatum, quod in hor-
tum conclusum à profani secu-
li commercio segregandum, cer-
tò cognovit. Testatus affirmavit
R. P. Villalobos Soc. Iesu vir san-
ctitate nobilis, suo se experimento
propheticum spiritum in Rosa de-
prehendisse, quæ sui cordis arca-
na didicerat: velut etiam Reu. P.
Phi-

Philippi de Tapia Callaoensis Re-
ctoris, & Michaelæ de la Massa,
Mariæ de Mesta, aliorumque: ita
etiam res loco, vel tempore diffi-
tas intuebatur animo. Diuturnam
vitam spopondit ægrotis quàm plu-
rimis ferme jam in hora decreto-
ria cum morte luctantibus: pueris,
puellisque prædixit quodnam vi-
tæ genus ingressuræ essent: spo-
pondit, nonnullos religiosæ mi-
vitæ nomen daturus, licet ab eo
vitæ instituto alienissimi essent.
Proregis animum immutandum
vidit, qui molesto muneri nobi-
lem virum destinaverat: Ferdi-
nando germano fratri scripsit,
orituram ex illo filiulam, cujus
vultum purpureus conspicuæ Ro-
sæ character ornaturus esset: &
illam innocentia singulari nobi-
lem fore: advectam ex Aethiopia
foeminam, quæ profitebatur, in
Panamâ sacro se fonte lustratam,

cognovit, neutiquam fuisse aqua
salutari respersam, & insperatis
indiciis convictam ad meliorem
frugem revocavit. Sacro illa ba-
ptismo tincta est, ac postridie fælix
interiit. Qui Rosæ cordium arca-
na, & quæ ventura trahebantur,
ostendit Deus, eandem legendi,
scribendique artem edocuit, ut
olim Sanctam Catharinam. Tan-
dem eodem magistro suæ mortis
diem, locum, horam edocta, ne-
mini dulciùs, quàm sibi, suoque
funeri fortunata vates præcinuit.

CAPUT XIX.

*ROSA mortis suæ præscia cum
ultima agrotatione generosè
luctatur, & sanctissimè
moritur.*

F Est a Diuo Bartholomæo dies,
qua se morituram præsciebat,
pre-

pretiosa, & chara illi fuit, & studio
singulari quotannis culta : hinc
suo non contenta jejunio, aliquot
innocentes pueros allexit, ut se-
cum in hujus festi pervigilio jeju-
narent. Mirabatur mater, quid filiæ
tam peculiare cum Sancto Bartho-
lomæo verteretur, donec audivit à
Virgine, hunc sibi nuptialem diem
fore. Supererat adhuc Rosæ trien-
nium mortalitatis, cum ex gravi
morbo decumbens videbatur om-
nibus vitæ marginem attigisse ; at
illa omnium judicio complorata,
certò affirmavit, distare nimium
optatissimam metam, ad quam
properabat. Annum denique suæ
ætatis trigesimum primum ingres-
sa, cujus ad exitum se non deven-
turam cognoverat, quatuor ante
obitum mensibus optimè valens.
Gundisalvi Quæstoris uxorem ad-
monuit de tempore, ac mortis ge-
nere, quo viam universæ carnis
in-

ingressura erat; quinimmo & locum designavit, in quo corporis vinculis erat solvenda. Didicerat ex celebri visione arcum, de qua supra locuti sumus, totam seriem immanium dolorum, quibus ultimò lancinanda erat, eosque acutissimos, & adeo multiplices fore, ut singula exhausti corpusculi membra proprium equuleum essent habitura: siti eadem sese torquendam, qua in Cruce Redemptoris fauces aruerunt: intimas ossium medullas ardore intolerabili depascendas. Illa tantæ amaritudinis calicem nil expavescens, in sacello Rosarii obtulit sese beneplacito divino, adeoque strenuè ad epotandum absynthium se comparavit, ut cordis amor vultum vehementer accenderit, & satis constiterit, tunc vicini sui obitus certam diem illi fuisse revelatam. Denique triduo ante fatalem ægrota-

tionem adiit parentum ædes, valedictura ibidem hortensi cellulæ cælestium suarum deliciarum conscia. Hinc olorino cantu mortem invitavit, & miris blanditiis S. Patrem suum Dominicum est allocuta, eique matrem à se destituentem commendavit. Kalendis Augusti sub vesperam sana, & vegeta suo se cubiculo incluserat, cum ecce sub noctis medium auditur miserabiliter ejulare: occurrit Quæstoris uxor cum filiabus, & ancillis, invenitque toto corpusculo extensam per solum, rigidis sine motu membris; At illa interrogata, quo morbo angeretur, & vellet ne medicum advocari, mali quidem se nihil perpeti, dixit; sed ipsam mortem in intimis viscerum suorum penetrabilibus liberrimè dominari; cælesti verò medico tantum opus esse. E terra in lectulum sublata, frigidus sudor

dor stagnabat in pallida fronte:
luctabatur velut ingenti mole pres-
sa respirandi facultas, tumorque,
ac tremor exanguę corpusculum
oberrabant. Subinde libero sus-
pirio IESV nomen tenerimę pro-
nunciabat, quod unicę illi erat
solatium. Adfuerunt medici, qui
statim exploratę vi pugnantium
morborum, statuerunt, acervum
tot cruciatuum humanę patientię
superiorem videri: neque dolores
illos naturales esse; lat calicem ip-
sum, quem Sponsus biberat, jam-
que miscebat amantissimę sponsę.
Et illa quidem à Confessatio, vive-
rito ne ab humili modestia provē-
nirēt Rosę silentium, pro imperio
adaçta, manifestę aperinē, quibus
nam cruciatibus intabesceret, dis-
cet experimento morborum om-
nia genera didicisset, hunc tamē
utpote peregrinum, non nisi per
similitudines potuit explicare, di-
xit.

xitque: videri sibi, candentis ferri globum per tempora adigi: à summo vertice usq; ad infimam plantam dexteri pedis ignitum verum transmitti: & simili ardore transversim à sinistro latere per medullium cordis ab ignito pugione pervadi, a quo decussato ardoris tormento forma Crucis exprimebatur: viscera per frustra candenti forcipe evelli: caput inclusum candenti galeæ videri, & validis puncturis ceu malleorum ictibus contundi: ossa resolvi sensim in pulverem, medullas instar cinerum aruisse. Fluctuantibus in mutuo aspectu confusis medicis, Rosa clam suo Confessario aperuit, frustra illos in exploranda morbi specie laborare, cum totus præternaturam esset: quocirca unicâ sibi tolerantia opus fore, ut quoquo modo singulos Crucifixi Sponsi sui dolores experiretur: sinerent, illam

lam sine omni humano alloquio aliquot dies jacere, cumque amore suo, cui se membratim confixam in cruce sentiebat, colloqui perpetuò. Sexta Augusti dies interrim illuxit, quam in Calvariae monte, non in Thabor cum Christo transfigurato transegit; namque accessit sinistri lateris paralyfis, perque consequentes dies pleuritis, asthma, ischias, colica, arthritis, denique continuæ febris ardor acerrimus. Usque adeo tota morborum cohors debuit incumbere, ut unica hæc Rosa fatali agrotatione solveretur, & articulim moriens gloriosum ferè martyrium ab Amore Sponso illatum subiret. Placidissima tot inter cruciatus animæ quiete fruebatur, suosque dolores intendi, & uberiorès poenas suis criminibus irrogari flagitabat. Subverebatur Virgo sapiens, ne tot simul morbo-

rum continua, & atrox violentia sibi rationis usum eriperet, ideoque tremula voce, flebilique supplex obsecravit domesticos, secum orarent Deum, ut illi se infortunio eriperet. Ac divina pietas respexit humilitatem ancillæ suæ, & integrum illi expediti judicij, ac linguæ vigorem peculiari prodigio inter assidua exhausti cerebri deliquia servavit immunem usque ad extremum halitum; cum tamen sæpe inter hos angores ab usu exteriorum sensuum illam abduxerit vel morbi violentia, vel contemplationum ardor. Incredibili siti torquebatur, cumque bibere ipsi per medicos non liceret, amarum tolerantiaæ calicem ad imum usque fundum exhauriebat cum Sponso. Tenerrimam conscientiam exomologesi pluries iterata, ac semel de toto vitæ decursu sese accusans, quàm diligentis-

simè

timè expiavit ; ita ut procul audirentur gemitus , & suspiria . Tri-
 duo ante fælicem transitum divi-
 num Viaticum , & sacrum oleum
 poposcit . Ut audivit epulum Eu-
 charisticum sibi afferri , vivido co-
 lore suffusa coruscantis auroræ in-
 star extemplo rubuit , mox gau-
 dio suo impar in altissimam exta-
 sim diriguit , & suscepto divino
 Sacramento pallido & exanguiore
 fixa hæsit . At extremam vinctio-
 nem tam alacri omnium sensuum
 officio moribunda excepit , ut verè
 oleum lætitiæ fuerit , quo se po-
 tius ad triumphum , quàm ad ago-
 nis conflictum sensit animari , vt-
 pote salutis adeo certa , ut insuper
 nosset , sine lustralis ignis conta-
 ctu se recto itinere ad Sponsi nu-
 ptias profecturam . Sæpius elata ,
 & sonora voce se orthodoxæ fidei
 filiam professæ est , ac Sancti Do-
 minici sobolem , candidum eius

Ordinis insigne , quod scapular-
re dicimus , perpetuò , & palam
ante se protensum volens . Exqui-
sitis ac summè efficacibus verbis
veniam à Deo exoravit pro illis
omnibus , qui in toto vitæ decur-
su molestijs , damnis , alijsque se
inurijs affecerant , & Crucifixi
parvum simulacrum manu strin-
gens , satiari non poterat his ver-
bis : Pater, ignosce illis . Dome-
sticos omnes acciri demissè peti-
vit , & licet ex his neminem ver-
bo , aut minimo unquam nutu of-
fendisset , singulos , & omnes
flebili voce oravit , ut indulge-
rent sibi , si qua in re ulli molesta
accidisset : dolere , quod adhuc per
biduum illis oneri esset futura :
haud procul abesse horam , quæ
domum Gundisalvi à foetidæ Ro-
sæ longo fastidio , inutilique pon-
dere liberaret . Nemo fuit , cui hæc
verba uberes lachrymas non ex-
cus-

cufferint, omnes enim eximiam illius sanctitatem mirum in modum venerabantur. At Quæstor metuens ne post obitum Rosæ descendendo tanti funeris thesauro lis inter Paræciam, & Sancti Domini Cœnobium exurgeret, nec ausus modestissimæ Virgini honorificum illud periculum aperire, ingenioso consilio dixit, obtinendæ apud Fratres Prædicatores sepulturæ desiderium potius mendicando, quàm testando innueret: quod ipsa præstitit, eum sui Ordinis esse morem existimans, & veluti indignam expelli se posse timens, nisi hoc infimis precibus impetraret. Sub vitæ finem crebriora Virgini fuere dulcissimorum raptuum intervalla, quibus paratæ cælestis gloriæ saporis jam delibabat, & iisdem gradibus, quibus debile corpusculum fatiscebat in mortem, animus in vigorem, &

securam hilaritatem attollebatur ; adeo ut auctam in singulas horas lætitiā nec voce, nec vultu dissimulare jam posset. Paucis ante obitum horis ab humanarum rerum exilio in se regressa, P. Fr. Francisco Nieto ingenuè, ac secretò dixit : Oh quàm excelsa, quàm pretiosa, jucunda, eximia tibi de suavitāte Dei, de læta ipsius curia, de regione æternitatis narranda haberem ! Pergo nunc cum tripudio ad perenniter contuendam pulcherrimam illam faciem, quam toto peregrinationis meæ exilio quæsiui. Omni deinde officio parentes, quosque parentum loco habuerat, Gundisalvum, ejusque conjugem, est prosequuta : tum germanos fratres sensim, deinde Quæstoris filias, tum reliquos domesticos efficacissima oratione ad amorem virtutis inflammavit. Media nocte clamor

fa-

factus est , & Sponsus venit, quem
 Rosa vultu sereno , & hilari exce-
 pit : germano fratri innuit , se mi-
 grare , & cervical subtrahi iussit ;
 ut capite ad nudum lignum accli-
 nato delibaret Crucis incommo-
 da : & , Iesus, Iesus mecum sit dul-
 cissimè ingeminans ad illum evo-
 lavit .

CAPUT XX.

*ROSÆ funebris pompa , ac tumulus :
 ejusdem sepulcrum Ordinarii au-
 ctoritate mutatum solenni Corpo-
 ris translatione , & ingens fama
 sanctitatis . Eadem in Sanctos à
 Clemente Decimo Pont. Q. M. de-
 scribitur .*

Vividus faciei color , labia
 rubentia , & in risum didu-
 cta , ambiguum fecere adstantibus
 Rosæ mortem , donec adhibito

speculo patuit nullum in ea super-
esse halitum. Tunc omnes repen-
tino prodigio pervasit arcanus læ-
titiæ sensus, ac tota domus visa est
innatare gaudio nuptiali. Ex ad-
stantibus una vidit numerosa An-
gelorum corona Rosæ lectum cir-
cundari, eademque juratò affirma-
vit, ante fælicem Rosæ transitum
fuisse à Christo revelatum, Virgi-
nis mortem fore admirabilem, &
sepulturam gloriosam, & vetuisse,
hilari funeri circumponi pannos
lugubres, sed imperasse, ut nivei,
quique triumphum decerent. Ac
triumphantis quidem in morem
deducta ad tumulum Rosa fuit,
nanque vix dies illuxerat, cum ad
Quæstoris ædes innumera homi-
num vis accurrit, mirantibus do-
mesticis, unde, aut quo pacto nun-
cium defunctæ & calentis adhuc
Rosæ tota Urbe diffundi potuerit.
Circūfusi promiscuè nobiles, igno-
biles,

biles, advenæ, cives, Indi, Hispani certatim Rosaria sancto Corpori applicuerunt: Hic flores vestri impositos diripere, hic vestis extrema, hic pedes raptim deosculari. Tentaverant pluries oculos defunctæ Virginis obtegere adductis palpebris, sed frustra, nam sensim recedentes liberum columbinis pupillis aditum dabant, ut Limenses suos dulciter intuerentur. Nisi Prorex armatæ suæ custodiæ cohortem prætoriam eò destinasset, explicare se domo funebris pompa non potuisset; adeo turba innumera compleverat atrium, ambulacra, & angulos omnes: Quin & areas, fora, vicos, quâ transeundum erat, aliquot ante horis occupaverat. Ideo Archiepiscopus, qui prodierat funus deducturus, ad Gundisalvi ædes eluctari diffidens, rectâ perrexit ad Templum Divi Dominici, ibique

ad valvas Virgineum funus præstolatus est. Interim sacra omnia Sodalitia, Religiosæ familiæ confluxere, & ipsum Metropolitanum Collegium præter morem ultro adfuit; nanque solum Archiepiscopos solet efferre. Accessit amplissima Curia Senatorum, qui honos defunctis Proregibus præstari solet. Matronarum ambitiosa pietas, & visendi ardor fenestras, pergulas, arcus occupaverat: & cerè nunquam aliàs sic visa est: universa civitas commoveri. Supposuit humeros feretro Capitulum Metropolitanum, deinde mutatis vicibus Curia Senatorum, mox primores ex Religiosis Ordinibus. Feriebant sidera clamores Sanctam nuncupantes Rosam: & nisi hastatorum bipennes quasi sepe objecissent corpori, pars illius exigua templo fuisset illata. Ut limen attigit, nova jucunditate:

re exhilarescere visa est Virginea
facies, & in Sacello, cui à Rosa-
rio nomen est, prodigiosa imago
Deiparæ repentè fulgore insolito
micuit, & manifestis lætitiæ argu-
mentis visa est excipere Rosam
suam. Mox eò confluit torrens
ingentis populi; cumque omnes
viderint splendores insuetos; fue-
runt etiam, qui suspicarentur, ima-
ginem portentoso sudore maduif-
se. Tumulum Rosæ circumfide-
bant Patres dignitate, & senio
graviore, tum ne thesaurus ille
diriperetur, tum ut eidem admo-
verent debiles, & claudos, qui
spe obtinendæ salutis accedebant,
neque spe frustrati sunt, ut conse-
quenti capite palam fiet. Ponè
constiterat hastata Proregis co-
hors, ut confusam molem irruen-
tis populi distineret, si posset. Se-
pulcro tradere sacrum corpus de-
stinabant Patres, cum tanta inlo-

nuit populi vociferatio, ut supersedendum fuerit: & nisi certa spē lactatus fuisset populus, domum nemo se recepisset. Sed turba, quæ templum infederat, dilapsa, confluit alia, & Archiepiscopus nutu, nanque vox audiri non poterat, jussit corpus Virginis in sacrarium deportari; cumque nec ibi esset in tuto, raptim inferri adytis Novitiorum. Ibi Præsul fusus in genua manum Virginis religiosè osculatus, eam in singulis digitorum articulis, perinde ac si viveret, tractabilem sensit. Post-ridie laxatis templi foribus, & relato Virgineo corpore, undatim irruit admissus populus; neque incolæ tantùm, sed & remotiores accolæ, qui à sex, & amplius leucis accurrerant. Proregis milites impetum frænare non potuerunt, ideoque omnis ætas, & sexus, ad feretrum eluctari contendit: hic

cal-

calculos precarios, alius sudaria, numismata, & quidquid ad manus erat, contingendo sacro corpori prætendebat. Turba languentium penè cum jurgio festinabat ad accessum: pueri per obstantium capita sublimes mittebantur ad contactum salutis: & vix ipsum corpus servari potuit, cum, velis, capillis, & vestibus direptis, sexies mutanda Rosæ fuerint indumenta. Resonabat undequaque templum perpetuis vocibus Sanctam proclamantium, & pulsu, ac tintinnabulis signum dabatur choro, cum respondendum erat Sacerdoti placulare sacrum de more ad aram facienti. Sed nisi cantores choro egressi ipsum altare circumstetissent, consummata non fuissent divina mysteria. Antistes è throno progressus ad feretrum ultimam efferendi ad tumulum corporis pompam adornabat, cum iterum

vali-

validioribus ingemuit clamoribus stipata turba, rursus densato cuneo undique irruit in suggestum, ideoque præsens periculum direptionis divertendum fuit oblata populo dilatione sepulturæ. Confirmavit spem pulchritudo, & suaveolentia Virginei corporis, quæ, nullum fore periculum spondebat, si vel in plurimos dies publico conspectui superesset. Per sex horas supra triginta idem perstiterat oris decor, oculorum patentium fulgor, & candor manuum: nulla insederat vultui fuligo sub aerem tam humido, calido, & ex concurrentium fluctibus pulverulento. At mirifica Cælestis odoris fragrantia spirans à sacro corpusculo post decem & novem menses recreavit illos, qui exhumatam Rosam nobiliori sepulcro crediderunt. Sub meridiem clausis templi foribus, & elusa spe populi

puli redituri, conditum est Ro-
 sę corpus in præparata, è cedro ar-
 ca, & in æde Capitulari sepultum.
 Ut primùm fores patuere, irruit un-
 da populi, & Sanctā inclamans, pul-
 verem sepulcri, terramque certa-
 tim asportavit. Inde cōtinuo fluxu
 rhedarum paterna Rosę domus fre-
 quentari cepit à nobilibus viris, qui
 hortensem cellulam venerabātur,
 quā Virgo solitudinis studio, inha-
 bitaverat. Eximia prodigia, quę
 palam crebrescebant, mirum in mo-
 dum commendabant populo se-
 pulcrum Virginis, cui nondum
 videbatur exhibitus debitus cul-
 tus. Idcirco solenniores instau-
 rare exequias, quibus ipse Prorex
 interesset, statutum fuit, cumque
 diu inter illum, & Archiepisco-
 pum amica quæstio agitata fuerit,
 cō quod præstitura dies, & sepe va-
 riata, semper alterutri incommo-
 da accideret, tandem ambo in quar-
 tam

tam Septembris convenerunt, omnino infcii, eam Sanctæ Rosæ Viterbiensis honori dedicatam esse. Tota iterum sedibus suis emota civitas templum implevit, & dum Sacerdos Numini commendabat Rosam, voce non impari sese populus commendabat Rosæ, cujus fama celeberrima brevi totius regni oppida permeavit. Potosi trecentis leucis Limâ diffitum in communem gratulationis impetum efferbuit: sonuere in turribus æra, campana, micuere lumina, & tota passim regio Peruana Rosam celebravit, à qua cuncti populariter sibi suffragium pollicebantur: neque tractu temporis elanguit populi ardor; namque miraculorum celebritas, & multitudo in dies ad invisendum Rosæ sepulcrum plures accersebat. Ideo cum tota Uibs, & vulgus paritet, & vtriusque ordinis principes affirmarent

Ro-

Rosam communem Limensium thesaurum publico deberi, Archiepiscopus omnium ardentissimo studio libenter annuit, & initio anni 1619. prodiit è sepulcro Virgineum corpus incorruptum, & suavissimum odorem inhalans. Celeberrimâ pompâ delatum fuit in templum, ubi egregius orator de admirabili Rosæ sanctitate verba fecit: ac tandem illata Virgo fuit cryptæ ad dexteram summi Altaris, ubi cum nimium glisceret populi turba, nanque omnes ad sepulcrum Virginis velut ad secundam aram subito convergebantur: hic perpetuus tumultus erat offerentium vota, suspendentium anathemata, deponentium scipiones, consulendum fuit reverentiæ sacri Tabernaculi, translatis exuviis Rosæ in Sacellum Sanctæ Catharinæ Senensis. Interim Limam pervenire literæ Apostolicæ, quibus

auctorati iudices tribunal ex formula sacrorum Rituum erexere, ut examen instituerent de vita, & gestis Ancillæ Dei Sororis Rosæ à Sancta Maria. Adfuere testes 183. cumque solum superesset inspectio reliquiarum, delegati ad hoc munus reppererunt Virgineum corpus expleto post obitum anno ferè jam quintodecimo, ossibus integris, & sicca hinc inde carne obductis, spirans odorem, quo fragrant siccatae ad solem Rosæ. Hinc aulam Capituli adiere lustraturi primum Virginis sepulcrum, è quo certatim religiosi homines hauriebant pulverem ad varia morborum genera depellenda; cumque non nisi quinque pondo terræ visa sint eruta, aliunde constitit, complures modios ex illo met foramine fuisse effossos. Sed cum exinde Procurator Generalis Ordinis Prædicatorum admonuisset

set Limenses Patres, habendam esse rationem Constitutionis Urbani VIII. qua viris nondum albo Beatorum ascriptis Apostolica authoritate publicus honor interdicitur, illi intempestivum cultum Venerabilis Rosæ abolendum censuerunt. Populus facellum questibus implevit, & sparso invulgus rumore, clam in Hispaniam delatum esse Rosæ corpus, non leve periculum imminuit Religiosis viris, qui non sine labore compescuere turbas, ostendentes, ita consulendum illustrioribus Rosæ honoribus, qui ab Apostolica Sede sperabantur. Et his quidem prælusit eximia Fama Sanctitatis, quæ omnes rapuit in admirationem Rosæ. Nimium quantum protenderetur hoc quaecumque compendium, si elogia præstantium virorum hic subnecterentur. Non tantum sacra D. Dominici

Fa-

Familia literis communi nomine
datis Sanctam illam, admirabilem,
clarissimis illustrem miraculis, &
prophetico spiritu, inque omni-
bus D. Catharinæ Senensi suppa-
rem dicit, sed & Limense Cœno-
bium Patrum Sanctæ Mariæ de
Mercede, & Nicolaus Mastrillus
Duran Provincialis Societatis Iesu
communibus suorum votis, &
Sacer Ordo Sancti Ioannis Dei, &
PP. Eremitarum Sancti Augusti-
ni, & Minorum Sancti Francisci,
& Ecclesiæ Metropolitanæ Limen-
sis nomine datæ literæ Summum
Pontificem infimis precibus exo-
rant, ut in Sanctos referat Rosam,
& tutelarem Limæ concedat: Ejus
virtutes enumerant, ac notissimam
Sanctitatem, & admiranda prodi-
gia. Addenda hic esset relatio
perhonorifica, qua Eminentissi-
mus Princeps Decius Cardinalis
Azzolinus in Sacra Rituum Con-
gre-

gregatione coram Alexandro VII. die 15. Septembris 1663. Rosæ virtutes enumeravit, & supplices literas novem diversorum Ordinum, ac illustrium virorum Limensium, tres Regis Catholici, tres itidem Eminentissimi Cardinalis de Aragonia, & binas Magistri Generalis Ordinis Prædicatorum, & perseverantiam, & augmentum famæ Sanctitatis, & cultum Populorum, quem amplificatum dicit Miraculis supra centum novendecim ex processu remissoriali auctoritate Apostolica confecto. Exinde religiosissimo examine de admirabili Rosæ vita, & prodigiis illustribus cum liquidò constitisset, eadem à Clemente Nono in Beatarum Virginum fastos relata fuit, honoribus illi consequenter indultis, qui tribui nunquam consueverunt nondum inter Sanctos recensitis: præsertim verò eidem colla-

collato præcipuo Patrocinio plurimum Regnorum, & universæ Americæ. Tandem à Clemente Decimo Pontifice Maximo non sine incredibili utriusque Orbis plausu, post nova, & præclara ab incomparabili Virgine perpetrata Miracula, primus hic Americæ flos, jandudum Cæli viridariis insitus, supremo Sanctorum cultu donatus est anno reparatæ salutis 1671.

C A P U T XXI.

ROSA post mortem & sapissimè, & multis apparet gloriosa. Eadem in scelestorum conversionibus, & obstinatione cordium emollienda mirabilis.

PRæfari libet, hæc etiam, quæ consequuntur, prodigia ex
au-

authenticis processibus Signorum ,
 Gratiarum , & Miraculorum fuisse
 delecta . Aloysia de Serrano , ut
 sæpissimè Rosam immortalem vi-
 dit, ita semel præsertim inter agmi-
 na Beatorum à Deipara Virgine
 deductam ad solium Divinum , &
 immensæ gloriæ coronâ decora-
 tam . Testatum reliquit coram
 Apostolicis Judicibus Quæstor
 Gundisalvus, viginti, & duabus vi-
 cibus Sancto Viro conspicuam
 fuisse gloriam Rosæ : quæ pariter
 Doctori Ioanni Del Castillo vi-
 dendam se præbuit in fulgidissi-
 mo lumine , rosis undique circun-
 datam . Deinde verò plusquam
 quinquagies eidem illuxit, multa,
 ac sublimia illi edisserens de feli-
 citatis suæ excelso fastigio ; quin,
 idem postrema testificatione anni
 1631. persanctè asseveravit , inte-
 gro sex mensium spatio interdium,
 noctuque se divinitus admissum

ad tantæ beatitatis spectaculum, ac
deinde Cælesti Ephæbo à Rosa
imperatum, ut suas vices obiret.
Quamplurimis aliis notæ Sanctita-
tis Rosa videndam se obtulit,
nunc Cæli viridaria cum Christo
perambulans, nunc eidem Lima-
nam Urbem, & Regnum Perua-
num commendans, nunc vultu hi-
lari, & jucundo nutu probans ea
quæ referebantur in tabulas à
Quæstoribus virtutum suarum,
nunc adornans conclave, chartam
dirigens, & graphiaria instrumen-
ta Tabellionibus disponens exce-
pturis ea, quæ testes proferebant
in commendationem sui, & riden-
ti ore visa gratiam pro obsequio
sibi exhibito spirare. Fuit etiam,
quæ nocte concubia hæc verba au-
divit: Rosa verè Sancta est: qui-
bus confirmata sunt ea, quæ de
Rosæ virtutibus juratò protulerat.
At Didaco Hyacintho Paceco,
qui

qui ex quotidiano hypographicae artis lucro victitans jussus fuerat in causa Venerabilis Rosę bis mille folia processuum, ut dicunt, seu actorum intra certum tempus scribendo absolvere, jamq; desperabat, se oneri parem fore; adeo lassabantur digiti, stupebat brachium, divaricabantur nervi, in somnis Rosa se scribæ suo exhibuit, & leniter accedens, dexterum jacentis brachium comiter arripuit, validè strinxit, & evigilans Pacecus scripsit ab aurora usque ad solis occasum, nulla digitorum lassitudine, nullo cruciatu nervorum, brachio levissimo, & supra modum expedito. Perrexit deinde reliquos dies scriptioni laboriosæ citra laborem impendere, attonitis quicumque Pacecum noverant, eiusque pulcherrimum characterem, ut chartis illitum viderunt. Decumbebat in Limano Cœnobio P.

M. Augustinus de Vega Ordinis Prædicatorum tunc Peruviae Provincialis, jamque de hominis vita conclamatum erat, cum Rosa Christophoro de Ortega suis in ædibus dormienti imperat, primo diluculo Cœnobium adeat, & Provinciale moribundum conveniat, denunciare, nequaquam illum tunc è vivis abiturum, sed aliquandiu sub Episcopali infula in vinea Domini laboraturum, quod re ipsa contigit. Celeberrima scelestorum apud Deum caufidica, ut convertantur, & vivant, Rosa fuit. Quamplurimi ad solum Virginei corporis inferetro contactum ita fuere doloris stimulo perculsi, ut ibidem ceperint coram populo elatis vocibus sua scelera detestari: & inter eos nonnulli juvenes inquinatæ vitæ, qui eo solum consilio venerant, ut defunctam pulcherrimam Virginem

nem intuerentur. Frequenter deinde ad Mariam de Oliva Rosæ matrem ivere complures, etiam ex Religiosis Ordinibus, ut illius egestatem aliquo subsidio recrearent, professi, hoc se tributum pendere Rosæ, cui debebant felicem suæ vitæ permutationem. Quidam profligatæ conscientiæ vitæ nunquam toto sacrilegæ vitæ suæ decursu ritè confessus, ab alterius pietate Rosæ commendatus, ab anno so conscientiæ lethargo evigilavit, adeoque animum, quem callus obduxerat, timor Domini emollivit, ut deinceps umbram sceleris horruerit. Ex concordii plurimorum, qui confessiones exceperant, testimonio liquidò constitit, post imploratum Rosæ in Cælo auxilium innumeros tum Limæ, tum in uniuerso Regno ex voragine scelerum emeruisse: quod beneficii genus inter præstantiora

solidæ sanctitatis argumenta ex
communi Sanctorum Doctorum
sententia meritò recensetur . Quid
quod Linæ paucis à Virginis obi-
tu diebus frequenter elutis animi
sordibus Divina passim convivium
celebrabantur : flagella , fetarum
cingula , & varii generis cilicia ob-
emptorum multitudinem subito
defecerunt . Insignes animorum
harpyæ luxuriæ cæno emerse in-
calles virtutis constantem fixere
pedem . In universa Peruana re-
gione Sacramentalis poenitentiae
administri communicatis indiciis
obstupere tantam morum muta-
tionem in populo à die , qua Rosa
in Sponsi sui Regno coepit agere
causam civium suorum . Foeminae
certatim abiecere vestium luxum :
Religiosa claustra cruentis flagro-
rum ictibus perpetuò personue-
runt : Confessariorum ubique se-
dilia planctu , & gemitibus sunt
ob-

obfessa : & vir gravissimus juratus affirmavit , ex quo Peruvia nostris detecta patuit , nullum inclaruisse divini verbi Concionatorem , qui tam universalem poenitentiae spiritum , & luculentum pietatis incendium excitaverit . Et egregiae quoque virtutis viros ad studium sanctitatis accendit : veluti Patrem Ioannem de Villalobos Rectorem Tyronum Societatis Iesu , qui cum à moritura Rosa postulasset , ut se traheret in odorem virtutum suarum , ab eius obitu sensisset arcanas cordis sui unctiones , & strisuras insolitas luminum divinorum . Quid quod & quocumque libitum illi fuit , Rosa pertraxit animos rebellantes . Mariam de Xuara foeminam praedivitem , implacabiliter averfam privignis suis Francisco , & Alexandro de Coloma , & eorum octo consobrinis pauperrimis ita emol-

livit exorata à Francisco , ut consequenti mane illico matertera resciderit testamentum , quo alijs omnia sua legaverat , & hæredes ex asse scripserit , quos antea oderat mirum in modum . Ludovica Barba vix non exanimis concidebat, cum audiret à Confessario suo divinitus innotuisse Rosæ , quod ipsa religiosum habitum esset aliquando indutura; sed illico à morte Rosæ Ludovica exarsit ambitu sacræ vestis , quam antea veluti Medusæ vultum horruerat . Alteram Ludovicam de Mendoza, incertam, ac de Rosæ Sanctitate animo fluctuantem, repentinus angoinvasit , adeo ut manibus , pedibusque mutilatam se crederet; gravior eiusdem spiritum caligo, ac tempestas mentem obsedit , ac turbatum cor quodam veluti terræmotu succuti cœpit; quæ omnia evanuerunt statim atque elatis vocibus

cibus intonuit : Rosa verè Sancta est . Usque adeo pro Sponsæ suæ honore certabat Sponsus ille diuinus , cui venti obediunt , & mare .

CAPUT VLTIMUM.

ROSÆ defunctæ attactu , aut invocatione , mors , morbi , pericula depelluntur . Eiusdem cingulum , vestes , sepulcro exemptus pulvis , & pictæ imaginēs phrenesim , cancerum , lepram , & omne morborum genus mirabiliter curant .

Q Vanuis perpetuum prædigiū fuerit Rosæ vjta , innumeris illam ad aliorum salutem miraculis decoravit Deus , quæ si omnia recenseretur , procul à compendii legibus iret historia nostra . Præstantiora quædam sufficiat in-

dicasse , inter quæ principem locum tenet revocata ad vitam, Magdalena de Torres filiola semestris Gregorii agricolæ , quæ cum exanimis à vespere usque ad posteræ diei lucem jacuisset , ianque paratus effodiendo sepulcro sarculus astaret , attactu uestis Rosæ illico viva , & sana in lecto confedit . Antonius Bran tribus mensibus cum febris , & angore pectoris congressus , tandem jacuit sine motu , anhelitu , & ullo vel minimo signo vitali : nec vellicatione , vel pulsu ullum à gelido corpore potuit extundi argumentum superstitis vitæ , quam tamen post aliquod tempus in corpus revocavit Rosa ab astantibus implorata . Dum in templo superfuit virgineum corpus , quamplurimis manifestam salutem attulit , veluti Elisabethæ Duran , cujus brachium à multo tempore sic-

cum

cum, & inutile humana ope curari non posse, medici statuerant: Et seruus Aethiops, qui dexteri brachii, manusque usum explicauit & nervorum attractione amiserat: Et Georgius de Aranda Presbyter, qui ob excepta in sinistro brachio vulnera in bello Chilensi, sanie, convulsione, ac tumore attractam manum, vegetam, sanam, & flexibilem reperit: Et Alphonsus Diaz mendicus toti Limæ notissimus, qui humili nixus fulcro, manumque, & pedem ex attractione inutiles per solum trahens, illico exiliuit in pedes, postquam ad Rosæ tumultum oravit: Adreperunt & pueri duo Aethiopes, quorum alter nec palmum à terra erigere se, alter vix grallis utcumque librare se poterat, & Rosæ beneficio ex templo incolumes duxere per templum choreas. Pueros quamplures variis morbis implicitos re-

penè Rosa incolumitate donavit; ideoque certatim de manu in manum porrigebantur, ut ad salutarium contactum pervenirent. Quid porrò enumerem revocatos à faucibus mortis adhibito cingulo, velis, particulis vestium, aut aliis, quæ pia sedulitas Rosæ corpori admoverat? Nullum penè genus ægrotationis esse reor, quo aliqui pertentati salutem Rosæ non debuerint. Et capite laborantes, & intolerabili cruciatu dentium, & oculis aliquandiu capti, & cancro perusti, lepra, impetigine, apostemate, arthritide, hydrocela, angina ad ultimum vitæ discrimen adducti: Et ex alto in profundas foveas prolapsi, & ab equis superirruentibus oppressi: Et qui mortem hauserant in poculis venenatis: Et quibus non nisi ad dolorem, & onus luxata brachia, pedesve supererant. At quos

quos urebat ardentissima febris ,
tàm præsentem Rosæ opem exper-
tissent , ut omnem adnotandorum
nominum diligentiam superave-
rint : & Ioannes Lobo Presbyter
sacramento coram Iudicibus fir-
maverit , se diversis locis , Chu-
quisaquæ , Potosij , Oruræ , ali-
bi , flagitantibus promiscuè omnis
ætatis , sexus , generis Infirmis præ-
buisse in potu vivificam terram ,
exemptam sepulcro Rosæ , & il-
lico in omnium conspectu ferè in-
numera curata fuisse languorum
genera , & febres præcipuè statim
abactas . . Pepercerat hæc terra
prodigosè corpori Rosæ , namque
cum Limense Cœnobium trecen-
tos numeret Religiosos viros , ut
aula Capitularis excipere possit
omnia decedentium cadavera , ex
agro Panamæ advecta gleba fuit te-
nuis , soluta , arenosa , & innato ca-
lore subtiliter vorax , quò extem-

plò resolvat ossium duritiem, & ingesta funera absumat. Mirum dictu, unico, totoque illo spatio, cui sacrum Rosæ corpus immissum fuit, gleba mutavit indolem, ac ferè pumicea soliditate in se coacta obduruit, ut solùm ibi digitis, levique manu teri, aut frangi nequeat; quin ferro opus sit, ut excaveretur: non sic reliqua illius cœmeterij suburra tritu facillima, tractabilis, fluida. Porro in hoc Rosæ sepulcro ad perenne humani generis beneficium viva salutiferi pulveris scaturigo latet; quod præsertim patuit anno 1632. cum post exportatos inde, totoque Regno distributos terræ cophinos, vix tria, vel quatuor pondo cavo scrobiculo cruta visa sunt. Et cum Pater F. Bernardus Marques paucis ante diebus totum immisisset brachium foramini, paulò post succrescente intus pulvere, vix manum

num immergere totam potuit. Sexenni Virgini musculos gutturalles inflammarat synanche, & chirurgus ulcere inspecto negaverat, puellam curari posse; nanque cancer se plagæ insinuaverat, & erosæ carnes frustillatim ulcere excidebant, atque in dies serpebat malum.

At epoto salutifero pulvere convaleuit. Ab annis viginti Abbatissa Monasterii Sanctæ Claræ miserimè torquebatur ex inflatione tibiæ, in qua sparsim plusquam quadraginta ulcerum hiabant ora; sed & febrim per viscera sævientem extinxit, & vulnera clausit pulvis hic salutaris.

At quid singula enumerem? Foeminas præcipuè puerperij doloribus tabescentes præsentissimo auxilio Rosa sæpissimè recreavit. Idcirco quamplurimis pueris, ac puellis additum fuit cognomen de Rosa in perpetuum beneficij monumentum. Ipsa na-

tura

tura voluit aliquando superesse
mnemosynon beneficii à Rosa col-
lati, veluti in Petro de Quixano,
qui cum transversim actus in utero
matrem exanimaret, ope Rosæ pro-
divit statim, pictam gerens in dex-
tera palpebra rosam. Et aliàs huic
novi Orbis Thaumaturgæ obtem-
perarunt mutatæ naturæ vices, ut
quando tauros ferociter irruentes
compescuit, & piscibus imperavit,
ut in retia confluerent, & puellæ
decenni vires addidit, ut pondus
eri geret, cui quatuor robusti baju-
li impares fore credebantur. Quin
etiam mentem aliquibus ab eius
statu dimotis illico redonavit. Hinc
universæ Peruviæ incolis commu-
ne studium fuit, in prodigiosæ vir-
tutis memoriam passim per ædes
Rosæ effigiem erigere, cujus oscu-
lo quàmplurimi cum morte lu-
stantes, enormiter saucij, per hu-
mum solutis membris repentes, sa-
lutem

Iutem illico receperunt. Ex his imaginibus aliquæ pallentem Rosæ vultum referentes visæ sunt venustè in genis rubere, & blando fulgore hilaritatis suæ omnium animos accendere ea die, qua publicè perlectæ sunt Apostolicæ literæ compellentes undique illos, quibus innotuerant Rosæ prodigia, ad eadem sacris iudiciis deferenda.



F I N I S.

INDEX

CAPITULUM.

- Cap. I. **R**OSÆ Natales, Indoles
Educatio, votumque
Virginittatis. pag. 1.
- Cap. II. *Rosæ erga parentes mira
obedientia, pietas, sollicitudo.* 6.
- Cap. III. *Rosæ, ut sequatur vesti-
gia Sanctæ Catharina Senensis,
Tertio Sancti Dominici Ordini
ascribitur.* 11.
- Cap. IV. *Rosæ mira animi submissio,
virgineus candor, benignitas,
aliæque virtutes.* 16.
- Cap. V. *Rosæ mira inedia, prodigio-
sa jejunia: Eadem tenerum cor-
pus ciliciis, flagris, catenis do-
mat.* 21.
- Cap. VI. *Rosæ capiti aculeatam co-
ronam infigit: ejusdem lectulus,
cervical, nocturna vigilia.* 31.
- Cap.

Cap. VII. Rosæ domestica solitudo, fuga publici, cellula perangusta. 46.

Cap. VIII. Rosæ cum Christo miræ desponsatio, Pronuba Augustissima Imperatrice Angelorum. pag. 47.

Cap. IX. Rosæ perpetuum orandi Numinis studium. 52.

Cap. X. Rosa funestis visis exercetur, ac horrendas alterius vite pœnas degustat. Doctorum examen subit, & ab illis mirum in modum probatur. 58.

Cap. XI. Rosa cum Christo, Deipara, Sancta Catharina Senensi familiariter, jucundè, assidue sermocinatur: domestica Tutelaris Angeli consuetudine fruitur: variè luctatur cum Demone, semper victrix, 69.

Cap. XII. Rosæ vexationibus, morbis, ærumnis pressæ prodigiosa tolerantia. 80.

Cap.

Cap. XIII. *Rosæ ardentissimus erga Sponsum amor varijs indicijs manifestus. Impetratum ab illa miraculum sudantis imaginis, ut Christum omnibus amandum persuadeat.* 85.

Cap. XIV. *Rosæ cum imagine Dei paræ familiare consortium, in divina Crucis signum religio: Mutui honores, quibus illa, & Sancta Catharina Senensis se sequuntur.* 93.

Cap. XV. *Rosæ fervidus amor, & cultus in divinam Eucharistiam, pro qua ad Martyrium se accingit.* 98.

Cap. XVI. *Rosæ eximium pro periclitantium animarum salute studium, & ardor consulendi corporali saluti proximorum supra modulum facultatum.* 104.

Cap. XVII. *Rosæ magna in Deo fiducia crebrò in suis, suorumque necessitatibus prodigiosum Celi præ-*

praesidium experitur. 113.

Cap. XVIII. Rosa divinitus cognoscit, edificandum in Urbe. Limana Sanctae Catharinae Senensis Cœnobium. Eidem alia complura arcana Deo revelante patefiunt. 118.

Cap. XIX. Rosa mortis suae praescia cum ultima agrotatione generosè luctatur, & sanctissimè moritur. 123.

Cap. XX. Rosae funebris pompa, ac tumulus: ejusdem sepulcrum Ordinarii auctoritate mutatum solenni Corporis translatione, & ingens Fama Sanctitatis. Eadem in Sanctos à Clemente Decimo Pont. O. M. describitur. 135.

Cap. XXI. Rosa post mortem & sapissimè, & multis apparet gloriosa. Eadem in scelestorum conversionibus, & obstinatione cordium emollienda mirabilis. 150.

Cap. Vltimum. Rosa defunctae attactu,

*Et tu, aut invocatione, mors, mor-
bi, pericula depelluntur. Ejus-
dem cingulum, vestes, sepulcro
exemptus pulvis, & pictæ imagi-
nes phtrenesim, cancrum, lepram,
& omne morborum genus mirabi-
liter curant.*

159.

THYRSUS GONZALEZ

Præpositus Generalis
Societatis Jesu.

CUm Compendium Admirabilis Vitæ S. Rosæ à S. Maria à P. Joanne Laurentio Lucchesinio Societatis nostræ Sacerdote conscriptum, aliquot ejusdem Societatis Theologi recognoverint, & in lucem edi posse probaverint, facultatem facimus, ut Typis iterum mandetur, si iis, ad quos pertinet, ita videbitur. Cujus rei gratia has litteras manu nostra subscriptas, & Sigillo nostro munitas dedimus. Romæ 2. Januarii 1697.

Thyrus Gonzalez.







